


廿二史攷異  
三







異攷史二十  
(二十)

撰昕大錢

# 廿二史考異卷七十四

## 宋史八

### 宰輔表一

建隆元年二月，吳廷祚自樞密使，加同中書門下平章事。本紀作同中書門下二品。廷祚父名璋，故改平章事爲二品。後晉天福四年，升中書門下平章事，爲正二品故也。表書平章事，誤。三年，依前同中書門下平章事，亦當

作同中書門下二品。

八月戊子，宰輔編年錄作甲申。

太平興國四年正月，石熙載自樞密直學士，遷簽書樞密院事。簽書當作簽署。張齊賢、王沔、楊守一、張遜、馮拯、陳堯叟、韓崇訓、馬知節、曹瑋、王德用諸人，皆除簽署，或同簽署。史家避諱，追改爲書字。又考是時，熙載寄祿官，兵部員外郎。四月，除副樞，進官給事中。十月，遷刑部侍郎。表失書。

八年正月戊寅，樞密使曹彬，以天平軍節度使。此事太宗紀失書。

雍熙二年十二月，柴禹錫自樞密副使，以右驍衛大將軍免。此事太宗紀失書。

四年四月，張宏自樞密副使，以御史中丞免。此事太宗紀失書。

端拱元年二月。楊守一自內客省使。遷宣徽北院使。簽書樞密院事。九月。楊守一卒。此事太宗紀失書。  
淳化二年三月。辛仲甫自給事中參知政事。以工部尚書知陳州。此事太宗紀失書。

四月。張宏自樞密副使。以吏部侍郎免。此事太宗紀失書。

九月。王顯自樞密使。責授隨州刺史。崇信軍節度觀察處置等使。案。節度使。例兼觀察處置等使。及本

州刺史。此文但當云責授崇信軍節度使。餘皆可省。

五年九月。寇準自守同知樞密院事。除參知政事。案。準于淳化二年。罷樞府。安得更云守同知樞密院

事。此必誤也。據宰相編年錄。是年。準自左諫議大夫。知青州。召。嘗云。守左諫議大夫也。

至道元年正月。趙昌言自參知政事。以戶部侍郎知鳳翔府。此事太宗紀失書。

三年六月。錢若水自同知樞密院事。以祕書院學士免。案。祕書省無學士之稱。亦無院名。據本傳。乃集

賢院學士也。若水時官工部侍郎。史亦失書。

咸平三年二月。王顯自樞密使。以山南東道節度使。同中書門下平章事免。此事真宗紀失書。

景德四年七月。馮拯自參知政事。以刑部尚書知河南府。兼西京留守。此事真宗紀失書。

五年九月戊子。馬知節自檢校太保。宣徽北院使。簽書樞密院事。進樞密副使。同日參知政事。趙安仁以

兵部侍郎。仍領玉清昭應宮使免。此二事真宗紀失書。

七年六月。馬知節自檢校太傅宣徽北院使。以潁州防禦使免。此事真宗紀失書。

九年正月。張旻自侍衛馬軍副都指揮使。威塞軍節度使。檢校太保。加宣徽南院使。兼樞密副使。此事真宗紀失書。

真宗紀失書。

九月丙辰。丁謂自參知政事。以平江軍節度使免。當作甲辰。

王曾自翰林學士兵部侍郎知制誥。加左諫議大夫。張知白自諫議大夫權御史中丞。加給事中。竝除參

知政事。此九月丙午事也。表失書日。又據本紀及宰輔編年錄。同日除參政者。尙有陳彭年一人。彭

年班在曾與知白之前。當是表有脫文爾。當云九月丙午。陳彭年自翰林學士工部侍郎知制誥兼龍

行。列于王曾諸人之前。

任中正自樞密直學士給事中。權知開封府。加工部侍郎。遷樞密副使。此事真宗紀失書。

天禧元年七月。王旦自太尉兼侍中。同中書門下平章事。以玉清昭應宮使免。此事真宗紀失書。

八月。張旻自樞密副使。以河陽三城節度使免。此事真宗紀失書。

二年六月。曹利用自檢校太尉宣徽北院使。同知樞密院事。進知樞密院事。此事真宗紀失書。

十二月。張知白自參知政事。以刑部侍郎翰林侍讀學士。知天雄軍。此事真宗紀失書。

四年八月。錢惟演自翰林學士。刑部侍郎知制誥。遷樞密副使。此事真宗紀失書。

九月周起自禮部侍郎樞密副使。以戶部侍郎知青州。曹瑋自簽書樞密院事。以宣徽南院使出爲環慶路馬步軍都部署。此二事真宗紀失書。

十一月戊辰。檢校太尉同平章事丁謂。太子少傅同平章事李迪。忿爭于上前。謂以戶部尙書知河南府。迪以戶部侍郎知鄆州。案是日。謂迪同罷。次日。詔謂赴中書視事如故。又明日。進謂左僕射。太子少師。表但書罷而不書復留及加官。此脫漏之甚矣。

宰輔表二

景祐四年。初。呂夷簡。王曾不協。曾言夷簡招權。交論于上前。參知政事宋綬善夷簡。樞密副使蔡齊頗附會。此敘諸臣罷免之由。當書于本傳表。惟記拜罷官位月日。不應贅出。

寶元元年。先是右司諫韓琦。屢言宰執非才。此語亦可省。

二年十月丁酉。仁宗紀作十一月。此誤。編年錄亦云十一月。

十月壬寅。仁宗紀作十一月。此誤。

慶厯四年。陳執中除參知政事。蔡襄孫甫等言其剛愎不可任。上不聽。蔡襄以下皆可省。

五年。先是樞密副使韓琦上疏。論富弼不當輕罷。不報。董士廉又訟水洛城事。此語皆可省。表無敘事之例。卷內似此者甚多。略舉數條。以見其繇而無當也。

皇祐元年。是歲。賈昌朝自山南東道節度使。同平章事。安國公。判鄭州。依前尚書右僕射。觀文殿大學士。判尚書都省。案昌朝于前二年罷相。此判尚書都省。非執政之職。不當溷入。

嘉祐四年五月。田況自樞密使。以尚書右丞。觀文殿學士。兼翰林侍讀學士。提舉景靈宮事。此事仁宗紀失書。

六年閏八月。歐陽修自禮部侍郎。樞密副使。除參知政事。此事仁宗紀失書。

治平元年十二月。王疇自翰林學士。禮部侍郎。除樞密副使。此事英宗紀失書。

樞密副使吳奎。丁父憂。奎以父憂去位。明年詔起復。固辭。而英宗紀不書罷。亦脫漏也。

二年二月。樞密副使王疇卒。此事英宗紀失書。

五月。陳旭自資政殿學士。禮部侍郎。除樞密副使。此事英宗紀失書。

七月。呂公弼自工部侍郎。權三司使。樞密直學士。除樞密副使。此事英宗紀失書。

三年四月。胡宿自樞密副使。以觀文殿學士。吏部侍郎。知杭州。郭達自殿前都虞候。容州觀察使。加檢校

太保。除同簽書樞密院事。十月。郭達自同簽書樞密院事。除陝西四路沿邊宣撫使。兼判渭州。此三

事英宗紀失書。

四年九月。韓絳自三司使。吏部侍郎。邵亢自樞密直學士。兵部員外郎。知開封府。竝除樞密副使。神宗



紀止載邵亢一人紀之漏也。

郭達自同簽書樞密院事以宣徽南院使判鄆州。此事神宗紀失書。

熙寧元年十二月邵亢自樞密副使以資政殿學士給事中知越州。此事神宗紀失書。

七年十二月王韶自觀文殿學士兼端明殿學士龍圖閣學士禮部侍郎知熙州除樞密副使。此事神

宗紀失書其十年二月書以王韶知洪州亦無罷字。

元豐元年閏正月簽書樞密院事曾孝寬丁父憂。孝寬公亮之子也。神宗紀書公亮薨而不書孝寬之去位亦闕漏。

宰輔表三

元祐元年閏二月安燾自同知樞密院事進知樞密院事。此事哲宗紀不書。考宰輔編年錄稱燾自同知遷知院命既下而給事中王巖叟封還之。侍御史劉摯右諫議大夫孫覺左司諫蘇轍亦言之。俱不聽。命再下而給舍又封還。三月詔安燾堅辭知樞密院事。特依所乞。依舊同知樞密院事。仍令班左丞李清臣上是燾之除命。既下而中止。故次年六月又有知院之除也。表失書仍舊任一節。

三年四月壬午。是日劉摯自中大夫尚書左丞除中書侍郎與孫固竝命。表失書。

四年六月丙午。是日許將自翰林學士除中大夫尚書右丞。表失載。

元符二年閏九月黃履自通議大夫尙書右丞以守本官知亳州。此事哲宗紀失書。  
建中靖國元年十一月庚申。編年錄作丙子。

崇寧元年六月丙申。據徽宗紀及編年錄。陸佃之罷。在五月己卯。許將四人之除官。在五月庚辰。與表異。

三年十二月同知樞密院事安惇卒。此事徽宗紀失書。

五年二月趙挺之自尙書右僕射兼中書侍郎加特進光祿大夫尙書右僕射兼中書侍郎。案挺之于去年六月罷相爲觀文殿大學士中太乙宮使。此當云自觀文殿大學士中太乙宮使不當仍舉前官也。

政和六年八月乙巳。編年錄作己巳薛昂自銀青光祿大夫尙書右丞除尙書左丞侯蒙自中大夫尙書左丞除

中書侍郎。徽宗紀以爲十一月戊申事。

十一月童貫自節度使開府儀同三司陝西河東河北宣撫使除簽書樞密院事。徽宗紀不載此事。編年錄載于是年二月。

靖康元年正月甲戌耿南仲自簽書樞密院事進同知樞密院事。欽宗紀編年錄俱不載此事。

#### 宰輔表四

建炎三年二月己巳，葉夢得自試戶部尚書，遷中大夫，除尚書左丞。案宰相編年錄，夢得執政纔十四日，自己巳至辛巳，祇十三日。至三月辛巳罷，授資政殿學士，提舉中太乙宮，兼侍讀，表祇書除而不書罷，亦疏漏也。

三月庚辰，朱勝非自守中書侍郎，除通奉大夫，守右僕射，兼中書侍郎，兼御營使，故事，命相進官三等，勝非特進五官。案勝非任中書侍郎日，官已至太中大夫矣，由太中而上，則有通議、通奉、正議、正奉、宣奉五等，此云進五官，當是宣奉大夫，非通奉也。

辛巳，盧益自中大夫，同知樞密院事，除尚書左丞。案高宗紀，益未拜復罷，爲資政殿學士，編年錄亦云。戊子，召王孝迪、盧益，竝奉使金國，益辭行，遂以本職提舉崇福宮執政。凡八日，表亦祇書除而不書罷，蓋史之疏漏多矣。

四年二月乙未，杜充罷右相，以觀文殿大學士，提舉江州太平觀。充于去年十一月降金，至是乃有罷相奉祠之命，所謂文而不實也。

六月丙戌，前宰相呂頤浩、朱勝非罷，爲江東西兩浙安撫大使。前宰相除官，表例不書，且其時頤浩爲江東安撫，勝非爲江西安撫，若兩浙路安撫，則劉安世爲之，安世非前宰相也。兩浙二字當刪，又不當有罷字。紹興元年，汪伯彥除江東安撫大使，二年，李綱除湖廣宣撫使，九年，張浚復資政殿學士，知福州。三十一年，張浚復觀文殿大學士，判建康府，與此同。

紹興三年十月癸丑。朱勝非以右僕射起復。勝非起復。本紀在七月乙亥。編年錄在七月癸酉。

秦檜案。檜以二年八月罷相。至八年三月。復自樞密使入相。表于三年四年五年六年七年第一格。俱

有秦檜字誤也。

湯思退于紹興三十年十二月罷相。而表于三十一  
年猶書湯思退。誤與此同。柯氏宋史新編皆刪去。

六年十二月。張守自資政殿學士。提舉洞霄宮。除參知政事。案。自是年至紹興三十二年。執政除罷。皆

失書寄祿之官。至孝宗卽位。史浩、張燾輩。乃復書寄祿官。隆興末。錢端禮、虞允文、王剛中。初除簽樞。亦

失書官。自後或書或否。至淳熙七年。周必大以後。執政書官者。十不得一矣。

八年十二月甲戌。此條當移于己未之後。

十一年十月癸巳。韓世忠罷樞密使云云。當在第四格。誤列于第三格。

十五年十月。秦熺自翰林學士承旨。除知樞密院事。案。高宗紀不載此節。但書以翰林學士承旨秦熺。

爲資政殿學士。提舉萬壽觀。兼侍讀。恩數視執政班。簽書樞密之下而已。考之編年錄。熺除知院。力請

依李淑故事。避親而罷。乃有資政學士之命。表書除而不書罷。蓋失之矣。至十八年三月壬午。再以熺

知樞密院事。四月。熺乞避父子共政。以爲觀文殿學士。提舉萬壽觀。兼侍讀。提舉祕書省。恩禮視宰臣

班次。亞右僕射。表卻失書。

十八年正月乙未。段拂罷參知政事。紀在二月。案。是歲正月庚申朔。無乙未日。

七月丙申。紀在八月。第三格。丁酉同。

二十六年八月。是月辛卯。程克俊罷參政。以資政殿學士。提舉洞霄宮。表失書。

二十九年正月丁亥。當作七月。柯氏新編。作七月。

九月甲午。陳康伯右僕射。當云陳康伯自參知政事。兼權樞密院事。除右僕射。同中書門下平章事。

三十一年六月庚申。周麟之罷同知樞密院事。高宗紀失書。

十月張浚復觀文殿大學士。判建康府。據高宗紀。是月甲子。復張浚觀文殿大學士。判潭州。十一月壬

申。以浚判建康府。表誤并爲一事。

隆興元年五月癸亥。孝宗紀作六月。

乾道元年二月戊申。陳康伯罷左僕射。授少師。觀文殿大學士。魯國公。致仕。案孝宗紀。二月丁未。陳康

伯薨。在罷相前一日。編年錄。康伯既薨。鎖院降麻。以少師觀文殿大學士致仕。洪氏容齋隨筆言。宣和

以前。未有既死而方乞致仕者。南渡之後。故實散亡。于是朝奉武翼郎以上。不以內外高卑。率爲此舉。

其最甚而無理者。雖宰相輔臣。考終于位。其家發哀。卽服。降旨聲鍾給賻。既已闋日。方且爲之告廷出

命。繪書之中。不免有親醫藥介壽康之語。如秦太師。万俟丞相。陳魯公。沈必先。王時亨。鄭仲益是已。

四月丙戌。洪适自翰林學士。左中奉大夫。知制誥。誥除端明殿學士。簽書樞密院事。孝宗紀作六月丙

戊許及之撰适行狀亦云六月此表誤也。編年錄亦作四月表蓋承其誤

三年十一月劉珙自翰林學士知制誥除同知樞密院事據朱熹撰墓記珙自朝散郎除中大夫

七年三月己丑張說自明州觀察使知閣門事兼樞密副都承旨除簽書樞密院事己丑當作己卯據

孝宗紀是月戊子說罷爲安慶軍節度使提舉萬壽觀至次年二月癸亥復除簽書樞密院事表于罷而復除兩事皆略而不書失其實矣

淳熙九年是年九月庚午王淮自右丞相兼樞密使福國公加特進左丞相封冀國公梁克家自觀文殿學士醴泉觀使兼侍讀遷金紫光祿大夫右丞相封儀國公表旣失書又自是年至十三年第一格俱當有梁克家字亦竝失之而于十三年第二格內卻有梁克家罷右丞相一節則是表本有而刊本脫去之耳蓋此表第四卷多闕文如高宗建炎三年七月鄭穀卒八月劉珙權同知三省樞密院事十一月周望同知樞密院事四年正月滕康劉珙罷紹興三年二月權邦彥卒六年二月沈與求罷七年六月沈與求卒孝宗乾道七年七月王炎除樞密使淳熙十五年正月施師點罷黃洽知樞密院事蕭燧參知政事光宗紹熙元年十二月王藺罷五年九月羅點卒寧宗慶元四年七月葉翥罷六年六月許及之以母憂去位嘉泰二年十一月陳自強知樞密院事許及之參知政事嘉定元年六月林大中卒八月邱審卒六年正月宇文紹節卒三月樓鑰罷七年正月章良能卒八年二月雷孝友罷十二年

四月曾從龍罷。十四年十二月鄭昭先罷。皆本紀所書而表無之。然柯氏新編表中一一具書。知柯所見本尙未脫落。監本屢經修補。寢失其舊。非盡史臣之失也。

紹熙五年八月留正罷左相。當云以觀文殿大學士判建康府。方合前後之例。

嘉定三年正月傅伯壽自翰林學士除端明殿學士。簽書樞密院事。寧宗紀云伯壽辭不拜。

### 宰輔表五

寶慶元年四月薛極端明殿學士。正議大夫。簽書樞密院事。案極于嘉定十五年已除簽書。中間不開罷免。蓋因轉官正議大夫而書也。此卷于宰執轉官皆書較之前卷加詳。

紹定五年十月丙辰以火延太廟。故薛極鄭清之喬行簡詔各降一官。案薛極等復官在五月。則降官必在五月以前。此云十月者刊本之譌。

端平二年六月葛洪除資政殿大學士。通議大夫。提舉臨安府洞霄宮。案理宗紀紹定四年六月洪已

除資政殿學士。知紹興府矣。此後未見復除執政之事。

十二年魏了翁自同簽書樞密院事督視京湖軍馬。除簽書樞密院事。力辭。改資政殿學士。湖南安撫使。

案理宗紀了翁知潭州。在次年四月。知潭州例帶荆湖南路安撫使。其實一也。

三年九月乙亥鄭性之兼同知樞密院事。李鳴復兼參知政事。理宗紀失書。

癸亥宣繒自資政殿大學士、光祿大夫、提舉臨安府洞霄宮、除觀文殿大學士致仕。案宣繒傳、嘉定十四年、同知樞密院事、兼參知政事、明年、拜參知政事、以資政殿學士奉祠、端平三年、召赴闕、升大學士、提舉洞霄宮、以觀文殿大學士致仕、繒之罷政奉祠、當在寶慶三年以後、紀表俱失書、此年被召進官致仕、則又例所不應書也。

嘉熙二年正月戊申、余天錫自少中大夫、試吏部尚書、除端明殿學士、同簽書樞密院事。理宗紀失書。  
七月庚辰、趙以夫自右文殿修撰、樞密都承旨、除沿海制置副使、兼知慶元府、同知樞密院事。理宗紀不書。  
淳祐元年三月以夫罷、紀亦不書。

三年二月壬寅、余天錫兼同知樞密院事。理宗紀失書。

十月庚申、許應龍罷簽書樞密院事、林略罷同簽書樞密院事。理宗紀失書。

四年九月癸亥、喬行簡自少傅平章軍國重事、特授少師、保寧軍節度使、醴泉觀使奉祠。理宗紀失書。

### 行簡罷政事

淳祐元年十二月、資政殿大學士、通議大夫、知慶元府余天錫、乞守本官致仕。案天錫傳、罷政、授資政

殿學士、知紹興府、浙東安撫使。此云知慶元府、豈初除紹興、而改除慶元乎、表失書其罷政之日。

二年二月、游侶出帥浙東、尋奉祠。當云自知樞密院事、兼參知政事、除知紹興府、浙東安撫使、尋改提



舉洞霄宮。

十二月丙寅。別之傑自同知樞密院事。兼權參知政事。除資政殿學士。湖南安撫大使。知潭州。理宗紀

失書。

四年三月己未。金淵除端明殿學士。簽書樞密院事。理宗紀失書。

九月丙午。史嵩之依前官起復。加永國公。案理宗紀。是歲十二月。詔許右丞相史嵩之終喪。則起復之

詔雖下。仍不果行也。表既失書。詔終喪一節。而于五年六年第一格。俱有史嵩之字。則誤以爲嵩之真

起復矣。柯氏新編于五年六年無嵩之名。

五年正月乙卯。劉伯正罷參知政事。十二月癸未。李性傳除職于郡。理宗紀失書。

六年十二月乙未。右丞相史嵩之守本官致仕。是月。嵩之服除。詔依前守金紫光祿大夫。觀文殿大學

士永國公。當云前右丞相。乃與見任有別。

七年三月戊辰。李韶依舊端明殿學士。提舉萬壽宮兼侍讀。韶非執政。不當列于表。

九年閏二月。吳淵以端明殿學士。沿江制置使。江東安撫使。兼知建康府。兼行宮留守。淵非執政。以次

年詔與執政恩數。故預書之。非例也。

十年三月。賈似道除端明殿學士。兩淮制置大使。淮東安撫使。知揚州。是時似道未爲執政。例不當書。

寶祐二年五月李曾伯除參知政事帥蜀郡。案曾伯傳但云進資政殿學士制置四川邊面與執政恩例不云除參政也。理宗紀亦不書除參政疑表誤。

開慶元年正月乙丑林存以資政殿學士知建寧府。已見上年十一月此重出。

景定元年九月厲文翁依舊端明殿學士提舉臨安府洞霄宮。文翁非執政不當列于表。

三年九月辛未資政殿學士沈炎薨。表于執政例書卒此書薨誤也。

四年六月丁巳馬光祖依舊觀文殿學士提舉臨安府洞霄宮。據理宗紀乃上年十一月癸巳事疑表誤。

五年八月乙丑姚希得除參知政事十一月乙未葉夢鼎自同知樞密院事除參知政事姚希得自簽書進同知樞密院事兼參知政事。本紀俱失書。

咸淳元年二月丁未姚希得自同知樞密院事除參知政事江萬里自簽書樞密院事進同知樞密院事。

度宗紀俱失書。考江萬里傳萬里自同簽書去官後知建寧府改知福州度宗卽位召同知樞密院事此云自簽書進同知院事亦誤也。

壬申王爚依舊端明殿學士除簽書樞密院事。度宗紀失書。

十一月辛丑留夢炎自權禮部尙書除端明殿學士簽書樞密院事。度宗紀失書。

八年三月丙子。趙順孫自同知樞密院事兼參知政事。授中大夫。案順孫于六年正月除同簽書樞密院事。其遷同知院未詳何時。

德祐元年三月乙亥。王爚自觀文殿學士除左丞相兼樞密使。案爚于上年十一月已除左丞相矣。考

瀛國公紀是歲二月似道上書請遷都下公卿雜議。爚言已不能與大計遂去。己巳召爚爲浙西江東宣撫招撫大使使居京師以備咨訪。蓋罷相于二月而再相于三月也。表失去中罷一節。

二月丁未。姚希得除參知政事。案希得傳咸淳五年卒。安得德祐初尙存。此必誤也。瀛國公紀亦無此事。

二年正月庚午。黃鏞自同簽書除參知政事。案瀛國公紀是日同簽書樞密院事。黃鏞參知政事。陳文

龍遁。謂鏞與文龍同遁也。表殆誤。

己卯。全允堅加太尉。除參知政事。案瀛國公紀是日加全永堅太尉。即允堅也。允永聲相近。參知政事常懋遁。本

各是一事。參知政事四字屬下句。永堅以后族加太尉。不爲參政也。表又誤。

# 廿二史考異卷七十五

## 宋史九

### 后妃傳

真宗章懷潘皇后。忠武軍節度使美第八女。案潘美傳。美子惟熙娶秦王女。平州刺史惟熙女。卽章懷皇后也。二傳或以爲美女。或以爲孫女。必有一誤。

章獻明肅劉皇后。蜀人龔美者。以鍛銀爲業。攜之入京師。后爲美人。以其無宗族。乃更以美爲兄弟。改姓劉。案長篇。劉氏始嫁蜀人龔美。攜以入京。旣而家貧。欲更嫁之。張旻時給事襄王宮。言于王。得召入。遂有寵。美因改姓劉。爲美人。兄云。此傳不言嫁美者。史家諱之外戚。劉美傳直以美爲劉通之子。略不及改姓事。更失其實矣。

仁宗郭皇后。初。帝寵張美人。欲以爲后。章獻太后難之。案長篇云。驍衛上將軍張美曾孫女。與郭后同入宮。上屬意之。將選爲后。卽此傳之張美人也。旣立郭后。以張爲才人。天聖六年。進美人。尋卒。明道二年。追册張爲皇后。蓋仁宗朝。內職追册后者二人。皆張姓。史但爲溫成立傳。而不及明道追册之后。亦疏漏矣。

尙氏與楊美人俱幸。數與后忿爭。一日尙氏于上前有侵后語。后不勝忿。批其頰。上自起救之。誤批上頸。上大怒。入內。都知閻文應因與上謀廢后。且勸上以爪痕示執政。上以示呂夷簡。且告之故。夷簡亦以前罷相怨后。乃曰古亦有之后。遂廢。此事又見宦者傳。

慈聖光獻曹皇后。樞密使周武惠王彬之孫也。案曹彬傳。追封濟陽郡王。累贈韓王。不云周王。蓋傳逸其文。

張貴妃。父堯封。堯封妻錢氏。案長篇。堯封。天聖初客南都。依大姓曹氏。曹以女妻之。後擢進士第。補石州軍事推官。未行。卒京師。從兄堯佐將赴官于蜀。曹氏請以諸孤從行。堯佐以道遠弗許。堯封母錢氏女也。張氏時八歲。與姊妹三人。由錢氏入宮寢。是錢氏乃堯封母。非堯封妻。傳誤以爲一人。

皇祐初。進貴妃。後五年薨。案仁宗紀。慶厯八年戊子十二月丁卯。册美人張氏爲貴妃。其明年改元皇祐。此云皇祐初。進貴妃者。誤也。紀載至和元年甲午正月癸酉。貴妃張氏薨。自戊子至甲午。凡七年。不得云後五年。

哲宗昭慈聖獻孟皇后。太后生辰。置酒宮中。從容謂帝曰。宣仁太后之賢。古今母后。未有其比。昔奸臣恣爲誣謗。雖嘗下詔明辨。而國史尙未刪定。豈足傳信。吾意在天之靈。不無望于帝也。帝聞之。悚然。後乃更修神宗哲宗實錄。此事又見范冲傳。而彼文較詳。又句濤傳稱。重修哲宗實錄。帝諭之曰。昭慈

聖獻皇后病革。朕流涕問所欲言。后愴然謂朕曰。吾逮事宣仁聖烈皇后。見其任賢使能。約己便民。憂勤宗社。疏遠外家。古今母后。無與爲比。不幸姦邪罔上。史官蔡卞等。同惡相濟。造謗史以損聖德。誰不切齒。在天之靈。亦或介介。其以筆屬正臣。亟從刪削。以信來世。朕痛念遺訓。未嘗一日輒忘。今以命卿。詞意亦與此同。惟以爲臨沒之訓。小有異爾。以史例言之。此事當入后妃傳。詳此而刪彼。庶幾簡而有要。

徽宗顯恭王皇后。大觀二年崩。諡曰靜和。紹興中。始祔徽宗廟室。改上今諡云。案徽宗紀。大觀四年十二月。改諡靖和皇后爲惠恭。禮志亦有之。獨本傳失書。又譌靖爲靜。

寧宗恭聖仁烈楊皇后。楊次山官至少保。封永陽郡王。次山二子。谷。封新安郡王。石。永寧郡王。自有傳。案外戚傳。次山由永陽郡王。進會稽郡王。官自少保。進少傅。加太師。非終於少保。永陽郡王也。谷。官太傅。永寧郡王。石。由少保。永寧郡王。進封魏郡王。較之此傳爲詳備。此但當云次山自有傳。餘文皆可省也。

度宗全皇后。理宗母慈憲夫人姪孫女也。案劉克莊集。有全安民贈太保唐國公。全份贈太傅豫國公。全大節贈太師徐國公。制大節者。慈憲夫人之父。余天錫傳所稱全保長也。全祖望據其家乘云。份五子。長思聰。次大中。次大節。次大聲。次大用。大中無嗣。以再從子昭孫爲後。卽全后之父。然則后爲慈憲

之姪女。非姪孫女矣。度宗時追贈大中太師申王。昭孫太師和王。宋史外戚傳不立昭孫傳。蓋宋末事迹缺佚。史臣失于采訪也。

弟清夫、庭輝等一十五人各轉一官。案劉克莊撰全清夫制詞云。屬以儲闈。正人倫之始。選諸戚畹。得邦媛之賢。如卿行尊。蓋主婚禮。是清夫于后爲尊行。史云后弟。誤。

### 魏王廷美傳

廷美母陳國夫人耿氏。朕乳母也。後出嫁趙氏。案杜太后傳。生邕。王光濟、太祖、太宗、秦王廷美、夔王光贊。則廷美與太宗同母。此云乳母耿氏所生者。蓋廷美得罪之後。造爲此言。

### 燕王德昭傳

惟吉生甫彌月。太祖命輦至內廷。擇二女媪養視之。案長編。惟吉初名德雍。太祖愛之。視如己子。故與諸叔聯名。及出閣始改名。此傳所失書也。秦王廷美第四子。亦名德雍。似不應與惟吉先名同。或長編傳寫有譌字。

紹興元年。詔曰。太祖皇帝。勩業垂統。德被萬世。神祖詔封子孫一人爲安定郡王。世世勿絕。今其封不舉。朕甚憫之。有司其上。今封人名。遵故事施行。此詔又見高宗紀。

元祐六年。簽書穎州公事。是時蘇軾知穎州。趙令時爲簽判。其銜當云。簽書穎州節度判官廳公事。史

刪去節度判官四字。竟似簽書州事矣。史家不通官制。涉筆便誤。一至于此。

初懿王生昌州團練使惟固。惟固生楚安僖王從信。從信生益公世逢。世逢生令憲。今案從信乃惟忠

之子。惟忠嘗爲昌州團練使。非惟固也。從信贈楚國公。此稱楚王一篇之中。自相抵牾。宗室世系表亦稱楚國公。又

以世系表考之。令憲乃北海侯世爽之子。從信子無名世逢者。未知孰是。乃令憲表作令憲。乃刊本之譌。

建炎二年。分西外宗子于秦州。朱子語類。徽宗以定室衆多。京師不能容。故令秦王位下子孫。出居西

京。謂之西外。太祖位下子孫。出居南京。謂之南外。

### 秀王子偁傳

時孝宗爲普安郡王。疑所服。詔侍從臺諫議秦熿等。請解官。如南班故事。案徽宗分宗室出居西京南

京。惟太宗以下子孫留京師。其中又分兩等。惟濮園之後。恩禮尤優。所謂南班宗室也。

### 漢王元佐傳

譖議趙齊王遙。翊善戴元頓首請罪。王遙姚坦傳作王適。

神宗封王後。以允言子宗說恭憲王長孫嗣。封祁國公。神宗當作仁宗。

### 昭成太子元億傳

宗保累官代州防禦使。襲封燕國公。慶厯四年。封建安郡公。傳失書。



越王元傑傳

嘗作假山既成。置酒召僚屬觀之。翊善姚坦獨頰首不視。元傑強之。坦曰。坦見血山。安得假山。言州縣鞭撻微民。以取租稅。假山實租稅所爲耳。語見姚坦傳中。坦傳與此略同。當去此存彼。

宗望終右武衛大將軍舒州防禦使。慶厯四年。封清源郡公。傳失書。

楚王元偁傳

允則無子。以平陽懿恭王之子宗達爲後。慶厯四年。封宗達恩平郡公。傳失書。

徽宗諸子傳

次陳國公機。案世系表。機贈太師兼右弼陳王。諡悼惠。傳失書。

公主傳

仁宗十三女。徐國、鄧國、鎮國、楚國、商國、魯國、唐國、陳國、豫國。九公主皆早亡。案長篇。仁宗第三女安壽公主。生三歲而封薨。追封唐國公主。第四女寶和公主。二歲而封薨。追封越國公主。皆張修媛所生也。傳有唐國無越國。敍次亦不合。

王溥傳

諡文獻。案王洙傳。夏竦卒。賜諡文獻。洙當草制。封還其目。曰。臣下不當與僖祖同諡。因言前有司諡王

溥爲文獻章得象爲文憲皆當改。于是溥得象皆易諡。又張揆傳仁宗詔改王溥諡。有欲議爲文忠者。揆曰。溥周之宰相。國亡不能死。安得爲忠。乃諡爲文康。此傳失書改諡事。

### 石守信傳

追封威武郡王。諡武烈。守信追封衛王。累封秦王。見楊億撰石保興碑。

保興本名保正。案保興碑云。公初名貞。太祖改錫今諱。此云保正者。史家避仁宗嫌名改之。

與戴興、楊守一竝爲澶州前軍駐泊。李繼遷入鈔。徙銀夏綏府都巡檢使。據碑。保興由銀夏綏麟府州

都巡檢。丁內艱。起復澶州駐泊都監。傳書除澶州駐泊于巡檢。夏綏之前。又失書母喪起復事。

淳化五年。真拜蘄州防禦使。爲永興軍鈐轄。改夏綏麟府州鈐轄。至道二年。徙延州都巡檢使。據碑。保

興自京兆府即永興軍兵馬鈐轄。徙延州路鈐轄。無再任夏綏事。

未幾卒。年二十八。保興封西安郡公。追贈貝州觀察使。傳皆失書。

### 高懷德傳

行周歷延潞二鎮。及留守洛都。節制宋亳。皆署以牙職。晉開運初。遼人侵邊。以行周爲北面前軍都部署。懷德始冠。自行周願從北征。以功領羅州刺史。及行周移鎮郟州。仍領牙校。從行周再鎮宋州。晉末。契丹南侵。以行周爲邢趙路都部署。禦之。留懷德守睢陽。會杜重威降契丹。京東諸州羣盜大起。懷德堅

壁清野敵不能入。行周率兵歸鎮。敵遂解去。漢初行周移鎮魏博。及再領天平。以懷德爲忠州刺史。領職如故。案五代史。高行周傳。唐明宗時。遷振武軍節度使。麻鎮章武。州。即延州。昭義。州。即潞州。晉高祖時。爲西京留守。徙鎮天雄。安從進叛。以行周爲襄州行營都部署。討平之。徙鎮歸德。州。即宋州。出帝時。代景延廣爲侍衛親軍都指揮使。是時李彥韜、馮玉等用事。乃求歸鎮。漢高祖入京師。加守中書令。徙鎮天平。其敍行周歷官。與此傳互異。今以通鑑及兩史參考之。則各有疏漏。歐史晉本紀。開運元年正月。契丹陷貝州。歸德軍節度使高行周。爲北面行營都部署。此卽懷德傳所載。遼人侵邊。行周爲都部署事。而行周傳不書。殆以其無功略之歟。懷德以宋太平興國七年壬午歲卒。年五十七。上溯開運元年甲辰。蓋年十九。故云始冠也。舊五代史本紀。開運元年四月。高行周爲侍衛親軍都指揮使。二年四月。移鎮鄆州。侍衛如故。三年六月。行周爲宋州節度使。加兼中書令。充北面行營副都統。蓋行周本以歸德帥領侍衛親軍。及移鎮鄆州。亦不之任。至三年六月。再鎮宋州。乃不典軍職。歐史謂李彥韜等用事。求歸鎮者。當在其時。惟歐史失書移鎮鄆州一節。不如懷德傳之詳備耳。宋史符彥卿傳。杜重威以大軍降。急詔彥卿與高行周領禁兵屯澶淵。會張彥澤引遼兵入汴。彥卿與行周遂歸遼。此卽懷德傳所云。行周爲邢趙路都部署事也。行周傳旣失書領禁兵北征事。其降于契丹。則兩傳皆諱而不言。彥卿傳又云。會徐宋寇盜蠶起。遼主卽遣彥卿歸鎮。是時彥卿爲徐帥。得遣歸鎮。則行周之歸宋州。亦契丹所遣也。漢

本紀。天福十二年。杜重威反。天平節度使高行周爲鄴都行營都部署。以討之。考薛史本紀。是年八月。以杜重威爲宋州節度使。以高行周爲鄴都留守。本是互相更換。及重威拒命。行周討平之。因留鎮天雄。至乾祐三年三月。乃自天雄再徙天平耳。歐史本紀既誤。而傳尤脫漏。不如此傳之核。

慕容延釗傳

加殿前都點檢。同中書門下三品。三品當作二品。

郭從義傳

父紹古。事後唐武皇。案東都事略。從義父古。無紹字。

卒年六十三。東都事略作六十四。

楊承信傳

楊承信。通鑑作楊信。蓋避漢隱帝諱。去上一字也。同時又有瀛州楊信。自有傳。而楊業之父亦名信。

馮繼業傳

加靈州大都督府長史。遷朔方節度。靈環觀察處置度支溫池榷稅等使。當云遷朔方節度使。餘文皆

可省。

三年。改鎮定國軍。案同州龍興寺。有開寶八年碑文。稱府主連帥太師。又云門下平章之命。禁殿宣麻。

則繼業鎮同州日嘗加檢校太師同中書門下平章事而傳失書

張從思傳

父存信振武軍節度後唐明宗微時嘗隸存信麾下五代史義兒傳李存信本姓張氏當是從恩之父也歐史不云爲振武節度

趙贊傳

晉祖起并門并門當云太原

晉祖命贊奉母歸薊門薊門當云幽州傳蓋采碑志之文未及刊改

張永德傳

年七十三東都事略作七十二

吳廷祚傳

加同中書門下三品三品當作二品

李崇矩傳

遵勛初尙主詔升爲崇矩子授昭德軍留後駙馬都尉遵勛官不止留後當云見外戚傳

李處耘傳

贈宣德軍節度使。案五代會要周顯德二年升湖州爲宣德軍節度使。

子繼隆繼和自有傳。凡父子祖孫各傳分在它卷者例書自有傳。此繼隆繼和二人即均處耘之後非

別有傳。當時史臣豈未考前史之例邪。

昭慶改名昭亮。至東上閣門使高州刺史。昭亮更名避章獻太后祖諱也。昭亮官至節度使不止刺史。

當云見外戚傳。

### 郭守文傳

并州太原人。守文字國華。見東都事略。

崇仁爲解州團練使。崇仁官亦不止團練。當云見外戚傳。

### 劉廷讓傳

劉廷讓字光義。案太祖紀乾德二年十一月江寧軍當作寧江軍節度使劉光義爲西川行營前軍兵馬都

部署。當作副都部署脫副字將步騎二萬出歸州道以伐蜀。光義即廷讓也。長編亦作光義光義必廷讓之名。後來避太

宗諱改以字行耳。其書義字或爲父或爲毅。曹彬曹翰劉福傳並作光毅皆避諱所改。

領江寧軍節度。江寧當作寧江。其時江南稱臣未入版圖。不當遙授節鎮也。

### 李懷忠傳

累遷殿前都指揮使、都虞候。案殿前都指揮使乃武臣之最貴者，懷忠名位尙微，不得除授。蓋都指揮使麾下別置都虞候，并非殿前都虞候也。

陳承昭傳

江表人。江表非郡縣之名，史家失考其本貫，亦當云江南人。方合史例。李之才，青社人，高文虎、四明人，李曾伯、覃懷人，青社、四明、覃懷皆非縣名。

李濤傳

晉祖幸大梁，張從賞以孟津叛。從賞當作從賓。

劉載傳

建隆四年，貝州節度使張光翰來朝。案光翰傳不載鎮貝州事。

張昭傳

詔正國節度盧質，本匡國軍，避太祖諱，追改。

及梁郢王均帝，均帝當作均王，或稱末帝。

竇義傳

乾德二年，范質等三相竝罷，越三日始命趙普平章事，制書既下，太祖問翰林學士曰：質等皆罷，普敕何

官當署承旨陶穀時任尙書乃建議相位不可以久虛今尙書乃南省六官之長可以署敕儀曰穀所陳非承平之制皇弟開封尹同平章事卽宰相之任太祖曰儀言是也卽命太宗署敕賜之此事又見職官志及趙普傳穀引唐大和中文露事數日無宰相左僕射令狐楚等奉行制書故儀以爲非承平之制今刪去穀引甘露事則儀語爲無著矣





# 廿二史考異卷七十六

## 宋史十

### 李昉傳

預宴大明殿上見昉坐盧多遜下因問宰相對曰多遜學士昉直殿爾當作直院即令眞拜學士令居多遜上案學士無品秩而以官寄祿昉時官中書舍人而多遜爲兵部郎中班居舍人之下及預宴列坐乃在昉上蓋詞臣班序直院列居學士之下初不論寄祿官之高卑也

昉坐左遷太常少卿俄判國子監案太常少卿正四品自舍人而除乃稱左遷者學士職居清要號稱內相罷內直而任卿監官品雖升猶爲左遷也

### 李宗諤傳

恥以父任得官獨由鄉舉第進士案洪容齋引國史許仲宣傳云仲宣子好問雍熙二年舉進士與李宗諤呂蒙亨王扶竝預廷試宗諤即宰相昉之子蒙亨參知政事蒙正之弟扶鹽鐵使明之子上曰斯竝勢家與孤寒競進縱以藝升人亦謂朕有私也皆下第見容齋四筆宋史呂蒙正傳亦云蒙亨舉進士高等既廷試以蒙正居中書故報罷而宗諤傳云第進士王明傳云子挺扶竝進士及第許仲宣傳云子

待問、再舉及第、然則終于不第者、惟蒙亨一人耳。

先是、後苑陪宴、校理官不與京官乘馬、不得入禁門。至是、皆因宗諤之請、復之。案、淳化初、宴近臣後苑、三館學士皆預閣門吏。第令直館赴會。宗諤以校理不得預宴、獻詩、有無聊獨出金門去、恰似當年下第歸之句。乃詔自今游宴、宜召直館。其集賢祕閣校理、竝令預會。卽其事也。其請京官乘馬入禁門、亦指京官任館職者、非凡爲京官者、皆得援此例也。宗諤時官祕書郎。正是京官。故有是請。又案麟臺故事。至道元年十月、三館學士各獻歌頌。以李宗諤、趙安仁、楊億、詞理精當、有老成之風、召至中書獎諭。明日、以祕書丞李宗諤爲太常博士。依前直昭文館。此事本傳失書。

呂蒙正傳

自是宰相子止授九品京官。遂爲定制。案聞見錄云、大理評事爲狀元及第、宰相任子之初官評事、正九品京官也。

咸平四年、以本官同平章事、昭文館大學士。宋初循舊制、昭文館集賢院大學士、及監修國史、皆以宰相領之。若三相則首相領昭文、其次領國史、其次領集賢。宋人集中、稱昭文相公、集賢相公、史館相公者是也。列傳或書或不書、于例初不畫一。

張齊賢傳

擢右諫議大夫。簽書樞密院事。齊賢以太平興國二年登科。六年爲轉運使。八年召還。遂由密學除執政。宋初用人之速。未有如齊賢者。

### 張子憲傳

遷右諫議大夫。知桂州。不赴。御史劾之。降祕書監。復爲光祿卿。加直祕閣。知廬州。遷祕書監。案麟臺故事。嘉祐三年。以光祿卿張子憲。趙良規。掌禹錫。齊廓。張子思。竝直祕閣。先是張子憲等。皆爲太常少卿。直祕閣。當遷諫議大夫。而中書以爲諫議大夫不可多除。故竝遷正卿。而故事。大卿監無帶館職者。故特爲請而還之。今據本傳。則子憲已遷諫議。因御史劾而左遷。且亦未嘗先直祕閣。與程俱所記殊不合。且旣云降祕書監矣。而又云遷祕書監。亦必有譌脫也。

### 賈黃中傳

與宋白。呂蒙正等同知貢舉。蒙正傳。失書知舉事。

### 錢若水傳

贈戶部尙書。案列傳。失載諸臣之諡。如錢若水諡宣靖。呂餘慶諡文穆。辛仲甫諡康節。李穆諡文恭。崔翰諡武毅。楚昭輔諡景襄。楊億諡文。楊徽之諡文莊。孫沔諡威敏。高永年諡忠愍。王溥改諡文康。田況諡宣簡。李東之諡懿靖。任福諡壯愍。姚麟諡忠愍。王中正諡恭僖。張茂則諡僖儉。李繼勳諡莊武。郭達

諡忠穆。蒲宗孟諡恭敏。王存諡莊定。鄭俠諡介。呂惠卿諡文敏。韓忠彥諡文定。韓粹彥諡文惠。胡宗愈諡修簡。溫益諡定簡。龔夬諡節肅。李邦彥諡文和。管師仁諡文懿。耿傅諡忠憲。王雲諡忠介。姚麟諡忠愍。張闡諡忠簡。鄭穀諡忠穆。胡世將諡忠獻。韓彥直諡莊敏。張俊諡忠烈。王德諡威定。王忠植諡義節。辛次膺諡簡穆。吳芾諡康肅。范成大諡文穆。呂祖儉諡忠。徐榮叟諡文靖。趙汝談諡文懿。至若李綱、劉安世、諡忠定。吳璘諡武順。張栻諡宣。洪咨夔諡忠文。吳淵諡莊敏。游似諡清獻。趙與憲諡忠憲。趙與騰諡忠清。岳飛改諡忠武。秦檜改諡繆很。則帝紀具載。而本傳轉不書。

溫仲舒傳

三年判昭文館大學士。命下卒。案昭文館集賢院大學士。惟見任宰相兼之。仲舒雖前執政。未應邊有大稱。當是除學士判館事耳。東都事略長編俱不載此事。

柴禹錫傳

景德初。子宗慶選尙。召禹錫歸闕。令公主就第謁見。行舅姑禮。固辭不許。案外戚傳。宗慶祖禹錫。鎮寧軍節度。父宗亮。太子中舍。宗慶尙太宗女魯國長公主。升其行爲禹錫子。公主傳亦云。宗慶禹錫之孫。帝命主以婦禮謁禹錫第。則宗慶實宗亮之子。此傳所書。失其實矣。宋制尙公主者。皆升與父同行。如王貽永。本貽正之子。升爲溥子。李遵勳。本繼昌之子。升爲崇矩子。本傳皆著其實。獨此篇乃自亂其例。

也。

宗慶永清軍節度。宗慶終于成德軍節度。且加平章事。當云見外戚傳。

王著傳

有傳見五代史。案著卒于宋初。不當入五代史。歐陽史亦無著傳。恐誤。

王祐傳

繼以用兵嶽表。徙知襄州湖湘平。移知潭州。案太祖平湖湘。在乾德元年。此傳上文言太祖親征太原。則在開寶二年。符彥卿離大名。亦在開寶二年。是時湖湘之平已久矣。祐知襄州。必在用兵嶺南之時。而史誤以爲湖南耳。

馬令琮傳

父全節。歷橫海、定遠、昭義、彰德、定武、天雄六節度。定遠當作安遠。字之譌也。定武本是義武。史家避太

宗諱追改。

何繼筠傳

父福進。歷事後唐。至周。累官忠武成德天平三節度。春明退朝錄。何中令福進。諡莊烈。在宋朝使相之列。據此傳。福進實卒于周代。蓋宋初追諡也。安審琦亦卒于五代。而宋初追諡恭惠。

李漢超傳

守恩子。祐之順之。用之潤之。慶之成之。藏之。案。祐之昆弟。官位事蹟。皆不著。而一一具列其名。似誌狀之文。非史法矣。王繼忠子。懷節。懷敏。懷德。懷政。蘇轍三子。遲。适。遠。蘇遠七子。籥。籍。節。笈。筆。籥。汪藻子。六人。恬。恪。恂。愴。懣。洪。适。子。九人。槻。秘。摺。樞。楹。榱。栝。劉光祖子。端之。靖之。翊之。竑之。張俊子。五人。子琦。子厚。子顏。子正。子仁。衛膚敏子。仲英。仲傑。仲循。句龍如淵子。佃。僕。似此類皆可省。

郭進傳

少貧賤。爲鉅鹿富家傭保。嗜酒蒲博。其家少年患之。欲圖殺進。婦竺氏。陰知其謀。以告進。遂走晉陽。案東都事略。進少依鉅鹿富人家傭作。人有欲殺之者。富人婦竺氏。陰告之。乃至晉陽。太平興國初。判邢州。訪竺氏。婦已死。家甚貧。得其女。撫養如己子。厚其資裝以嫁之。史但云婦竺氏。而不云富人婦。似竺氏爲進之婦矣。

太平興國初。又賜宅一區。上文已云。太平興國初。賜京城道德坊第一區。此重出也。

安守忠傳

贈太尉。案。宋時武臣。有兩安守忠。長編載元豐七年九月。戶部尙書王存言。準詔具析安守忠預繪像。因依勘會所采臣僚勳績。竝于國史實錄。考求事迹。據本傳所載。贈太尉安守忠有戰功。故迹當預繪。

像。其捧日左廂都指揮使。欽州團練使安守忠。史冊無載。卽無預繪像人數。詔景靈宮改繪。贈太尉安守忠像。併推恩其家。先是景靈宮繪像。管勾官誤以欽州團練使安守忠充數。而贈太尉安守忠之孫自言。故命存考定。而降是詔。

### 王昭遠傳

諡惠和。春明退朝錄。作和惠。

### 張鑑傳

建議割瑞州清江。瑞州當作筠州。南渡後避理宗嫌名。改筠爲瑞。此時無瑞州之名也。

### 馬全義傳

幽州薊人。案王安石撰知節神道碑云。馬氏故扶風人。至公高祖。徙處雲中。雲中爲契丹所得。故馬氏又徙處浚儀。今開封府祥符也。傳云幽州人。與碑不合。

### 馬知節傳

諡正惠。案諡法無正字。宋初馬知節、呂端諡正惠。高保融諡正懿。李昉、王旦諡文正。本皆貞字。史臣避仁宗嫌名。追改之。其後范仲淹、司馬光、蔡卞之文正。吳育之正肅。呂公著之正獻。呂大防之正愨。亦以正代貞。非有二義。元明以後。正貞始兼用。或謂正美于貞。蓋未考其緣起耳。



王繼忠傳

遂陷于契丹。繼忠後事具見遼史。其力戰被陷事已見王超傳。不當更爲立傳。

王延範傳

詣休復告延範將謀不軌及諸不法事。延範誕妄取禍。不足立傳。當增見徐休復傳。

呂端傳

幽州安次人。父琦。晉兵部侍郎。端與餘慶爲昆弟。籍貫家世已見餘慶傳。當云參知政事餘慶之弟。乃合史例。王旦父祐自有傳。而旦傳又載先世三代官爵及父祐行事。司馬光父池自有傳。而本傳又書陝州夏縣人。父池。天章閣待制。李壁父燾自有傳。而本傳又書眉之丹稜人。父燾。典國史。皆當準此例刊正。

李沆傳

吾老不及見。此參政它日之憂也。案沆爲相時年止五十餘。未可云老。且少于沆僅十歲。與沆同年登科。其參知政事距沆入相之始。不過一年有餘。安得遽以新進目之。沆雖先旦而卒。然人命修短不齊。豈能預卜。考呂氏家塾記。李文靖居相位。王公參預朝政。一日便殿論邊事退。公歎曰。何日邊候徹警。使吾輩得爲太平宰相。文靖不答。至中書。獨召公語云。至非聖人。外寧必有內憂。譬人有病。常在目前。

則知憂而治之。沆死。子必爲相。遽與契丹和親。一朝疆場無事。不有盤游之樂。必興土木之工矣。又元城語錄云。李丞相每朝謁奏事畢。必以四方水旱盜賊不孝惡逆之事奏聞。上爲之變色。慘然不悅。同列以爲非。丞相曰。人主一日豈可不知憂懼。若不知憂懼。則無所不至矣。史臣據此二事。稍改竄增飾之。遂有此失。呂氏記沆死。子必爲相之語。本無病也。

### 李維傳

除柳州觀察使。柳當作相。柳州非節鎮。不得有觀察也。

### 向敏中傳

翰林學士李宗諤當對。帝曰。朕自卽位。未嘗除僕射。今命敏中。此殊命也。此事洪邁容齋隨筆嘗辨之。傳範娶南陽郡王惟吉女安福縣主。爲密州觀察使。諡惠節。傳亮子經定國軍留後。諡康懿。經女卽欽聖憲肅皇后也。當云見外戚傳。

### 王欽若傳

王曾對曰。欽若與丁謂、林特、陳彭年、劉承珪。時謂之五鬼。林特增見欽若傳。以五鬼之目牽連及之也。及敘特事。又云。當時與陳彭年等號五鬼。語見王欽若傳。一篇之中。重複如此。

### 丁謂傳

眞宗崩。議草遺制軍國事。兼取皇太后處分。謂乃增以權字。案王曾傳。曾入殿廬。草遺詔。以明肅皇后。權聽斷軍國大事。丁謂入。去權字。曾曰。皇帝冲年。太后臨朝。斯已國家否運。稱權猶足示後。且增減制書。有法表則之地。先欲亂之邪。遂不敢去。長篇亦云。丁謂欲去權字。以王曾言乃止。與此傳正相反。似當以曾傳爲是。然遺制出自中書。而謂爲首相。終能聽用讜論。亦自足多。故太后惡之。

陳堯咨傳

子述古。太子賓客致仕。案歐陽修撰堯佐神道碑。以述古爲堯佐子。予見述古題名石刻。稱孟父中令大人。太尉相公。季父太尉康肅公。中令者堯叟也。太尉相公者堯佐也。太尉康肅公者堯咨也。述古爲堯佐子。史繫于堯咨傳。誤矣。中令太尉皆贈官。史于堯叟書贈侍中。不云中書令。于堯佐書贈司空。不云太尉。蓋後來加贈。史家不能悉書也。

宋祁傳

預修廣業記。業當作樂。

景祐中。詔求直言。案景祐紀年。在慶厯之前。上文書庠復知政事。罷祁翰林學士。改史館修撰。修唐書。皆慶厯中事。不應更敘景祐。恐是皇祐之譌。下文封張貴妃云云。正皇祐元年事也。

宋湜傳

諡曰忠定。春明退朝錄。諡恭質。

王嗣宗傳

嗣宗嘗自言知武事。可授廉車。廉車。謂觀察使也。

卽拜耀州觀察使。知永興軍府。宋時以觀察使爲武臣寄祿官。嗣宗進士第一人出身。官至侍郎。秩四品。換觀察使。武資。秩三品也。石林燕語云。國朝侍從官。間有換武職者。依唐袁滋故事例。皆換觀察使。如李尙書維。自承旨。李左丞仕衡。自三司使。皆然。天聖間。陳康肅。堯咨以翰林學士知開封府。亦換宿州觀察使。加檢校司徒。知天雄軍。陳力辭。明肅后諭之曰。天雄朔方會府。非文武兼才不可。陳不得已受命。自是加留後。遂建節。石林博于典故。然不知嗣宗換武資。更在李陳諸人之前也。堯咨亦進士第一人。正用嗣宗故事。

子堯臣。內殿承制。與參政王堯臣同姓名。且又同時。

夏侯嶠傳

咸平元年。以戶部郎中罷。郎中。當作侍郎。

張觀傳

字思正。宋史列傳。有兩張觀。兩王著。兩黃震。



# 廿二史考異卷七十七

## 宋史十一

田錫傳

出知陳州。坐稽留殺人獄。責授海州團練副使。案容齋四筆云。陳州民張矩。殺里中王裕家兩人。知州田錫未嘗慮問。又詣闕訟冤。遣二朝士鞠之。皆云非矩所殺。裕家冤甚。其子福應募爲軍。因得見曰。臣非欲隸軍。蓋家冤求訴耳。太宗怒。付御史府治之。寘矩于法。二朝士皆坐貶。錫與通判郭渭謫爲海郢州團練副使。史于錫傳既不詳書。而刑法志亦不之及。何也。

王禹偁傳

憲宗嘗命裴洎銓品庶官。洎當作埴。

尹洙傳。

年四十七。歐陽修撰墓志。作四十六。

謝絳傳

年四十六。歐陽修撰墓志。作四十五。

梁顯傳

年九十二。案陳正敏遜齋間覽稱梁顯八十二歲。狀元及第。卒年九十餘。士大夫多以爲口實。洪文敏引國史。顯卒年四十二。史臣云。梁之秀穎。中道而摧。以正遜齋之誤。東都事略亦云。年四十二。與國史同。李心傳朝野雜記載。狀元年三十以下者云。梁內翰顯。年二十三。顯登第在雍熙二年乙酉。至景德元年甲辰卒。恰是四十二歲也。傳作九十二。未知何據。卽如其言。追溯及第之時。止合七十三歲。與遜齋說亦不合。

適相仁宗。別有傳。案適爲顯之子。顯傳在第五十五卷。而適傳在四十四卷。先後亦爲乖次。

楊徽之傳

周顯德中舉進士。劉溫叟知貢部中甲科。據五代會要在顯德二年。

時劉昌言拔自下位。不踰時參掌機務。懼無以厭人望。常求自安之計。童儼爲右計使。欲傾昌言代之。嘗謂徽之曰。上遇張洎。錢若水甚厚。旦夕將大用。有直史館錢熙者。與昌言厚善。詣徽之。徽之語次及之。熙遽以告昌言。昌言以告洎。洎方固寵。謂徽之遣熙構飛語中傷。已遂白上。上怒。召昌言質其語。出徽之爲山南東道行軍司馬。熙落職。通判朗州。此事又見張洎。錢熙傳。童儼當作董儼。

查道傳

享年六十四 新安志年六十二

許元傳

累遷國子博士監、在京榷貨務三門發運判官。案歐陽修爲元誌墓，但云三司使，言公材以主權貨，不

云爲三門發運判官也。

進金部，特賜進士出身。案元由任子入官，以會計特賜進士，非常格也。

旣而元欲專六路財賦。六路者：江南東路、江南西路、淮南路、兩浙路、荆湖北路、荆湖南路也。

鍾離瑾傳

後徙淮南轉運副使，歷京西河東河北轉運使，改江淮制置發運使。案文潞公奏狀言：轉運使有路，分輕重遠近之差。河北、陝西、河東三路爲重路，歲滿多任三司使副，或發運使，發運任滿亦充三司副使。成都路、次三路、京東西、淮南又其次，江東西、荆湖兩浙又次之，二廣、福建、梓利夔路爲遠小。瑾自淮南京西移河東河北，改發運，乃任三司戶部副使，與潞公所云正合。

杜杞傳

父鎬，蔭補將作監主簿。案東都事略：杞爲鎬孫，當云以大父鎬蔭補。

楊敞傳



保靜軍節度使重助之曾孫。案史無重助傳。惟列傳第三十二卷有楊美并州文水人。官至保靜軍節度使。疑卽此傳所云重助也。畋稱楊業爲曾伯祖。則美與業蓋昆弟行。

楊日嚴傳

河南人。進士及第。案楊克讓之孫日嚴亦登進士第。官職方員外郎。彼傳云同州馮翊人。此云河南人。兩人同時。又同姓名。其兄同名日華。疑本是一人。祖貫馮翊。後徙洛陽爾。

賈黯傳

以人齒噉之。齒讀如矢。說文齒糞也。

吳及傳

建請擇館職分校館閣書。竝求遺書于天下。語在藝文志。案藝文志不載吳及奏議。

楊億傳

卒年五十七。東都事略作年四十七。億嘗代寇準草奏請皇太子親政。斥丁謂姦邪。準旣逐。億亦以憂卒。景祐元年樞密使王曙上其事。詔贈禮部尙書。諡曰文。有司言故事非嘗任二府及事東宮四品無贈官。仁宗曰。億爲國竭忠。可拘常典乎。此事傳所當載。而史失之。億官工部侍郎。秩四品。

樂黃目傳

又撰學海搜奇錄四十卷。藝文志作六府卷。黃目父子撰述志所載者不及其半。蓋志傳之文多不相應。

### 楊覃傳。

唐有京兆尹憑。居履道坊。僕射於陵。居新昌坊。刑部尚書汝士。居靖恭坊。時稱三楊。皆爲盛門。而靖恭尤著。案覃與大雅。皆虞卿之後。所述世系。兩傳略同。而此篇尤宥。史家失于刪併。由不出一人之手也。三楊之目。乃唐代故事。而宋史載之。失限斷之例矣。

昭宗朝。以兵部員外郎使吳越。楊大雅傳及唐書宰相世系表。竝作刑部員外郎。

### 楊允恭傳。

請建大庾縣爲軍。官輦鹽市之。詔建爲南安軍。案地理志。淳化元年。以虔州大庾縣建爲軍。據此傳。似在太平興國間。

巢廬江二縣。舊隸廬州。道遠多寇。民輸勞費。允恭請以二縣建軍。詔許之。以無爲爲額。案地理志。太平興國三年。以廬州巢縣無爲鎮建爲軍。以巢廬江二縣來屬。據此傳。似在淳化以後。

### 王曾傳。

舊用郎中官判大理寺。帝欲重之。特命曾。且謂曾曰。獄重典。今以屈卿。案。是時曾以右正言知制誥。兼

史館修撰、正言官從七品。尚在郎中之下。其後再遷。纔得主客郎中。而此時轉以判寺為屈。何邪。蓋宋時宰執之下。卽以兩制為華選。知制誥與學士對掌內外制。地望清華。不與它官校品秩。以待從充郎官差遣。故云屈也。案閣門儀制。大宴。知制誥與尚書丞郎同行。見宋朝事實。朝會班。知制誥在祕書監、光祿衛尉、太僕、大理諸卿之上。史所載寧登瀛不為卿。寧抱槩不為監之諺。正謂此爾。

皇祐中。仁宗為篆其碑曰旌賢之碑。大臣賜碑篆。自曾始。春明退朝錄。皇祐中。王侍郎子融守河中還。

以唐明皇所題裴耀卿碑額上之。仁宗遂御篆賜沂公碑曰旌賢。其後踵之者。懷忠。呂許顯忠。李忠旌

忠。寇萊全德元老。王太尉教忠積慶。文潞公親賢。李侍中襄親。齊國獻穆公主旌功。曹襄舊學。晏元獻。崇儒。丁文舊

德。張鄧顯先積慶。趙中令旌忠懷德。張侍儒賢。高文襄賢。范文思賢。劉丞相沆清忠。王武旌忠元勳。狄武襄

忠。陳恭純孝。張文英宗御篆。忠規德範。宋元上御篆。淳德守正。呂文大儒元老。賈魏今考宋史。呂夷簡、

寇準、王旦、李用和、曹利用、晏殊、張士遜、范仲淹、劉沆、陳執中、宋庠、賈昌朝傳皆載賜額。與宋敏求所記

合。而它傳則遺之。又案杜大圭名臣琬琰集所載。仁宗御篆陳琳碑額曰旌勞。神宗篆高瓊碑額曰決

策定難。顯忠基慶。哲宗篆趙抃碑額曰愛直。韓絳曰忠弼孝忠。賜韓世忠曰中興佐命。定國元勳。吳璘

曰安民保蜀。定功同德。傳皆失書。丁文簡事度也。高文莊者若訥也。王武恭者德也。狄武襄者青也。張文孝者觀也。

張知白傳。

罷爲刑部侍郎翰林侍讀學士知大名府卷春明退朝錄祖宗時宰相罷免唯趙令得使相餘多本官歸班參樞亦然天禧中張文節始以侍讀士知南京天聖中王文康曙以資政殿學士知陝州自慶厯後解罷率皆得職焉案次道舉張知白王曙兩人爲執政罷免加職出外之例若除職而留京師者則如至道二年錢若水自同樞除集賢院學士判院事咸平元年夏侯嶠自樞副除翰林侍讀學士皆實履其職景德二年王欽若自參政除知政殿學士亦居京師奉朝請非外任也宰輔表王曙罷參政出知鄆州在明道元年七月而宋云天聖者本天聖十年其十一月方改明道也

### 晏殊傳

宰相寇準曰殊江外人帝顧曰張九齡非江外人邪宋初南人罕登貴仕治平以前拜相惟丁謂晏殊章得象曾公亮四人自王介甫後南人入相者浸多矣寇丁之隙亦起于南北分黨萊公固賢相未免有意排抑南人

### 呂夷簡傳

帝始與夷簡謀以張耆夏竦皆太后所任用者也悉罷之退告郭皇后后曰夷簡獨不附太后邪但多機巧善應變耳由是夷簡亦罷及宣制夷簡方押班聞唱名大駭不知其故而夷簡素厚內侍副都知閻文應因使爲詞久之乃知事由皇后也此事又見宦者傳

韓琦傳

慶曆二年與三師皆換觀察使。范仲淹、龐籍、王洙不肯拜。琦獨受不辭。案是時范仲淹帥環慶，除邠州觀察使。龐籍帥鄜延，除延州觀察使。王洙帥涇原，除涇州觀察使。琦所受者必秦州觀察使也。仲淹籍傳俱云辭觀察不拜，獨洙傳不書辭不肯拜，亦疏漏。

常平使者散青苗錢，琦亟言之。帝出其疏以示宰臣曰：琦真忠臣。雖在外不忘王室，朕始謂可以利民，今乃害民如此。且坊郭安得青苗，而亦強與之乎？安石勃然進曰：苟從其欲，雖坊郭何害？明日稱疾不出。此事又見食貨志。

王琪傳

徙知江寧。案景德建康志：嘉祐二年二月，尚書工部郎中龍圖閣待制王琪知府事。三年八月，琪除知制誥，就移知蘇州。五年二月，工部郎中知制誥王琪再知府事。四月，移知陳州。傳祇載知江寧一任。餘竝失書。戈宙襄云：王珪兄名琪，王德子亦名琪，一文臣，一武臣也。

文彥博傳

自澶州商湖河穿六澤渠。河渠志：湖作胡，澤作塔。塔澤同音。吳中復蔡挺傳亦作六澤。

遂加彥博兩鎮節度使。兩鎮者，河東、永興軍也。

字持國。司馬光傳家集稱其字曰秉國。溫公父名池。與持同音。故易之。

熙寧二年遷翰林學士。案石林燕語韓門下維以賜出身。熙寧末特除翰林學士。崇寧中林彥振賜出身。用韓例。亦除翰林學士。國朝以來學士不由科第除者。惟此二人。彥振謂據也。今據傳書賜進士第。而維傳不書賜出身。亦史文之闕。

包拯傳

知天長縣。有盜割人牛舌者。主來訴。拯曰。第歸殺而鬻之。尋復有來告私殺牛者。拯曰。何爲割牛舌而又告之。盜驚服。案穆衍傳。調華池令。民牛爲仇家斷舌。而不知何人。訟于縣。衍命殺之。明日仇以私殺告。衍曰。斷牛舌者乃汝邪。訊之具服。此二事正相類。

歐陽修傳

左遷知制誥。知滁州。此據四朝國史本傳之文。然知制誥非左遷之官。以歐陽年譜及文集考之。是時修方以龍圖閣直學士充河北轉運使。坐孤甥事。落直學士。罷轉運使。仍帶右正言知制誥。出知滁州耳。

時在外十二年矣。案修以慶厯四年甲申。自諫院出爲河北轉運使。至至和元年甲午服除赴闕。實十

有一年。史云十二年者誤。

劉敞傳

奉使契丹。素習知山川道徑。契丹導之行。自古北口至柳河。回屈殆千里。欲夸示險遠。敞質譯人曰。自松亭趨柳河。甚徑且易。不數日可抵中京。何爲故道此。譯相顧駭。愧曰。實然。但通好以來。置譯如是。不敢變也。案閻詢傳。使契丹時。契丹在靴淀。迓者王惠。導詢由松亭往。詢曰。此松亭路也。胡不徑葱嶺而迂枉若是。豈非夸大國地廣。以相欺邪。惠慚不能對。此二事亦相類。

曾鞏傳

建昌南豐人。案曾致堯傳云。撫州南豐人。考宋初。南豐已隸建昌軍矣。當從鞏傳。鞏爲致堯之孫。致堯傳失書。孫鞏自有傳。鞏傳又不言其祖。于史例爲疏漏矣。

王鞏傳

從蘇軾游。軾知滁州。滁當作徐。登黽山。吹笛飲酒。黽山。本桓山。史家避諱改。

# 廿二史考異卷七十八

## 宋史十二

陳襄傳

嘗訪人材之可用者。襄以司馬光、韓維、呂公著、蘇頌、范純仁、蘇軾。至於鄭俠三十三人對。今蘇州府學。有石刻熙寧經筵薦士章稿。題云樞密直學士尙書右司郎中兼侍讀臣陳襄上進三十三人者。端明殿學士、右諫議大夫、集賢院修撰、提舉西京嵩山崇福宮、司馬光。端明殿學士、翰林侍讀學士、尙書吏部郎中、知許州、韓維。翰林侍讀學士、寶文閣學士、尙書戶部侍郎、提舉西京嵩山崇福宮、呂公著。祕書監、集賢院學士、知杭州、蘇頌。右司諫、直集賢院、孫覺。尙書祠部員外郎、祕閣校理、知齊州、李常。尙書兵部員外郎、直集賢院、知和州、范純仁。尙書祠部員外郎、直史館、權知河中府、蘇軾。尙書祠部員外郎、集賢校理、權知洪州、曾鞏。尙書祠部員外郎、集賢校理、同修起居注、孫洙。祕書丞、集賢校理、史館檢討、王存。太子中允、館閣校勘、判武學、顧臨。祕書省著作佐郎、集賢校理、知太常禮院、林希。太子中允、館閣校勘、簽書、應天府判官廳公事、劉摯。太常博士、崇文院校書、句當宗正丞公事、虞太熙。太子中允、監西京洛河抽稅竹木務、程顥。太子中允、權發遣淮南西路轉運判官公事、劉敞。殿中丞、新差、充秦鳳熙河路



措置邊事司句當公事兼催督軍需薛昌朝祕書省著作佐郎前崇文院校書張載權興國軍節度掌書記見磨勘蘇轍前台州司戶參軍召試館閣孔文仲新差歙州軍事推官吳賁前潤州延陵縣令吳恕尚書屯田郎中知開封府太康縣事林英尚書都官員外郎監泗州河南轉般倉孫奕祕書省著作佐郎監揚州糧料院林旦太常博士新差監衡州在城鹽倉鄒何尚書右司郎中分司南京李師中尚書兵部員外郎傅堯兪太常博士新差河東路提點刑獄公事胡宗愈前祕書省著作佐郎王安國太子中允降授大理評事唐垌前光州司法參軍監安上門英州安置勒停鄭俠也紹興元年十一月詔以襄薦章寫示百僚竝鏤版行下諸路此事史亦失書

孫洙傳

尋幹當三班院 幹當本是句當史家避高廟嫌名追改王師約傳同管當三班院楊佐傳幹當河渠司

曾孝蘊傳管幹發運司耀耀事王韶傳管幹秦鳳經略司機宜文字韶子厚幹當熙河公事蕭注傳管

幹麟府軍馬傅堯兪傳趙繼寵越次管當天章閣林旦傳幹當奏院宋球傳幹當禮賓院張整傳管幹

馬軍司宇文昌齡傳辟幹當公事汪藻傳遷江西提舉學事司幹當公事外戚傳李評幹當三班院向

傳範管幹客省閣門皇城司宦者傳劉惟簡幹當延福宮李舜舉歷幹當內東門御藥院講筵閣實錄

院又爲廣西幹當公事高居簡幹當御藥院蘇利涉幹當御藥院又幹當皇城司姦臣傳蔡確管幹右

廂公事。選舉志。管幹御藥院使臣。又戶部幹官。麴院權稅務。將作監管幹公事。職官志。樞密院篇。神宗以存等皆館職。不欲令承旨提舉。詔改爲管幹。戶部篇。增置幹當公事二員。紹聖元年。罷戶部幹當公事。置提舉管幹官。建中靖國元年。復幹當公事官二員。司農寺篇。熙寧四年。詔諸路提舉常平管幹官。令提舉司保明計功賞之。六年。置幹當公事官。九年。以幹當公事官。所至輒用喜怒。罷之。皇城司篇。幹當官七人。元豐六年。詔幹當皇城司。元祐元年。詔幹當官。閱三年無過者。遷秩一等。開封府篇。左右廂公事。幹當官四人。經略安撫司篇。其屬有幹當公事。崇寧五年。詔河東同管幹沿邊安撫司公事。合班篇。管幹殿中省。尙舍尙藥尙醞尙輦尙衣尙食局。幹當左右廂公事。宮觀篇。自今竝依嵩山崇福宮。舒州靈仙觀。置管幹或提舉。詔卿監職司以上提舉。餘官管幹。又有以京官爲幹當者。職田篇。發運司。幹當公事。轉運司。管幹文字。提舉常平倉司。幹當公事。蔡河許汝石塘河都大催綱。管幹機宜文字。府界提點司。幹當公事。食貨志。農田篇。政和六年。立管幹圩岸圍岸官。常平義倉篇。詔諸路各置提舉官二員。以朝官爲之。管當一員。京官爲之。河北轉運司。幹當公事。王廣廉。會子交子篇。崇寧三年。置京西北路專切管幹通行交子所。鹽中篇。提舉江西常平張根。管幹運淮鹽於江西。茶下篇。熙寧七年。始遣三司幹當公事李杞入蜀。又令茶場都大提舉。視轉運使。同管幹視轉運判官。阮治篇。以許天啓同管幹。陝西。阮治事。天啓爲同管幹。欲專其事。諸路阮治。自川陝京西之外。竝令常平司同管幹。入內皇城使。

裴絢爲涇原幹當、市易篇。因命詔爲路帥司幹當兼領市易事。詔在京市易幹當公事孫迪。又詔三司幹當公事李杞等、兵志鄉兵篇。每五十頃爲一營。差詣農事官一員幹當。詔將隴山一帶弓箭手人馬別置一將管幹。每路各置幹當公事使臣二員。嘗充巡檢或管幹本族公事。保甲篇。增同判一。主簿二。幹當公事十。提舉司之。幹當公事者。訓練篇。部隊將幹當公事。凡三十九人。軍甲篇。始置軍器監屬。有丞。有主簿。有管當公事。馬政篇。詔熙河路應縣鎮城峇關堡官。竝兼管幹給地牧事。皆以幹代句。或以管代句也。神宗以後。四朝國史。成於淳熙之世。故多追改字。史家承其舊文。未及改正爾。

孟元傳

贈遂州觀察使。元有女孫。爲哲宗皇后。贈太尉。曾孫忠厚。在外戚傳。此傳皆失書。

侍其曙傳

侍其曙。字景升。史失其里居。

祥符二年。黎州夷人爲亂。詔曙乘驛往招撫。其酋首納款。殺牲爲誓。曙按行鹽井。夷人復叛。曙率部兵百餘。生擒首領三人。斬首數十級。因上言蠻阻險拒命。請必加討。詔知慶州孫正辭。環慶駐泊都監張繼勳。領陝西兵同曙俱進。所至皆降。案蠻夷傳。大中祥符元年。瀘州言。江安縣夷人爲亂。詔遣閣門祇候侍其旭。乘傳招撫。旭至。蠻人首罪。殺牲爲誓。未幾復叛。旭因追斬數十級。擒其首領三人。二年。旭言

夷人恃巖險未卽歸服。詔文思副使孫正辭等爲都巡檢使。乃分三路入其境。脅以兵威。皆震懼伏罪。兩傳一云黎州。一云瀘州。地名互異。正辭官名。一稱其寄祿官。一稱其差遣。非有異同。其易曙爲旭。則避英宗諱也。曙乘傳招撫。撫而復叛。據蠻夷傳在祥符元年。孫正辭等進討。則在二年。本傳俱以爲二年事。似誤。

### 王安石傳

自禮部侍郎超九轉。爲吏部尙書。案職官志。文臣敍遷之例。禮部侍郎當轉戶部。吏部左丞而後遞轉。六曹尙書。故云超九轉。

神宗欲命相。問韓琦曰。安石何如。對曰。安石爲翰林學士。則有餘。處輔弼之地。則不可。此語已見琦傳。

### 蔡挺傳

元豐二年薨。列傳書薨卒。當有一定之例。趙普、文彥博、王安石、蘇頌皆宰相。而書卒。呂公弼、蔡挺、鄧洵武以執政書薨。此可議也。

### 王韶傳

蕃部俞龍珂。長編或作龍渴。渴珂聲相近。

### 沈遵傳

年四十。王安石撰墓志云。年四十三。

李大臨傳

定以初等職官。超朝籍。躡憲臺。宋初。選人寄祿官凡四等。留守節察判官。節察掌書記支使。防團判官。留守節察推官。軍事判官。謂之兩使職官。防團軍事推官。軍監判官。謂之初等職官。錄事參軍。縣令。謂之令錄。軍巡判官。司理。司法。司戶。縣主簿。縣尉。謂之判司簿。據職官志。李定時爲秀州軍事推官。故云初等職官。而蘇頌及定傳。俱云秀州判官。則是兩使職官。不當云初等矣。頌。大臨爭李定事。詳見頌傳。此文重出。

自爭李定後名益重。世并未敏求。蘇頌稱爲熙寧三舍人云。此語亦見蘇頌傳。

呂夏卿傳

夏卿學長於史。貫穿唐事。夏卿有唐書直筆新例一卷。

又通譜學。創爲世系諸表。歐陽公新唐書宗室宰相世系二表。出於呂夏卿律麻。天文五行志。出於劉義叟。方鎮表。出於梅堯臣。能集衆人之長。故較舊史爲善。

程師孟傳

程師孟字公關。吳人。師孟一見列傳第九十卷。一見循吏傳。兩篇無一字異者。循吏傳多兩字前後不檢照如

此又列傳第一百廿二卷李光傳末附見其子孟傳事凡百十五字而第一百六十卷復爲孟傳立傳  
司馬光傳

陝州夏縣人也父池天章閣待制

案呂公著父夷簡陳執中父恕富直柔祖弼張鑑父藏英皆有傳故

本傳不書某縣人若戚綸父同文已有傳矣而同文傳復書應天楚邱人

應天府宋州

韓琦父國華已有傳

矣而琦傳復書相州安陽人琦曾孫肖胄傳又書相州安陽人司馬光父池已有傳矣而光傳復書陝州夏縣人曾布祖致堯兄輩皆有傳矣而布傳復書南豐人孫瑜父奭已有傳矣而瑜傳復書博平人張燾父根已有傳矣而燾傳復書饒之德興人劉光世父延慶已有傳矣而光世傳復書保安軍人劉子羽父韜已有傳矣而子羽傳復書建之崇安人楊存中父震已有傳矣而存中傳復書代州崞縣人胡世將曾祖宿已有傳矣而世將傳復書常州晉陵人徐俯父禧已有傳矣而俯傳復書洪州分寧人常同父安民已有傳矣而同傳復書邛州臨邛人沈晦祖邁已有傳矣而晦傳復書錢塘人蔣芾曾祖之奇已有傳矣而芾傳復書常州宜興人留正六世祖從效自有世家矣而正傳復書泉州永春人李壁父燾已有傳矣而壁傳復書眉之丹稜人孟珙父宗政已有傳矣而珙傳復書隨州棗陽人高文虎從父閱已有傳矣而文虎傳復書四明人王阮曾祖詔已有傳矣而阮傳復書江州人鄭望之父僅已有傳矣而望之傳復書彭城人吳潛父柔勝已有傳矣而潛傳復書宣州寧國人梅堯臣從父詢已有

傳矣。而堯臣傳復書宣州宣城人。傅察從祖堯俞已有傳矣。而察傳復書孟州濟源人。郭忠孝父達已有傳矣。而忠孝傳復書河南人。其子雍傳。又云其先洛陽人。邵伯溫父雍已有傳矣。而伯溫傳復書洛陽人。賈似道父涉已有傳矣。而似道傳復書台州人。苗傅祖授已有傳矣。而傅傳復書上黨人。上黨即潞州此類皆可從省。

王廣淵除直集賢院。光論其姦邪不可近。昔漢景帝重衛綰。周世宗薄張美。廣淵當仁宗之世。私自結於陛下。豈忠臣哉。宜黜之以厲天下。此語已見廣淵傳。

請判西京御史臺歸洛。光以端明殿學士、翰林侍讀學士、判留臺。元豐初。提舉嵩山崇福宮。傳皆失書。田夫野老皆號爲司馬相公。光嘗除樞密副使。雖辭不拜。而當時猶以相公稱之。蓋非兩府不得稱相公也。

### 范鎮傳

超授直祕閣。故事。館閣校勘須遷校理。乃得直閣。邵亢自國子直講館閣校勘。進集賢校理。加直史館。司馬光亦自國子直講爲館閣校勘。加集賢校理。改直祕閣是也。鎮以校勘徑遷直閣。故云超授。

### 范百祿傳

對入三等。范祖禹撰百祿墓志云。國朝制策三等。惟吳育、蘇軾及公三人。

改吏部侍郎。墓志云：右選官冗，累歲乃得調。既赴官而宗室許占射成資，卽罷去。爲筦庫者患之，公奏請宗室員外置，不獨恩厚公族，且使在官無非次替移之怨。此事本傳不書。

范祖禹傳

字淳甫，一作純夫。

蘇軾傳

歐陽修以才識兼茂薦之。案宋制科之目，賢良方正，能直言極諫爲一科，才識兼茂，明於體用爲一科。二蘇當日同舉直言極諫科。穎濱志其兄墓亦云：文忠以直言薦之。傳云：才識兼茂者，誤也。凡應制科者，先就祕館試論六首，中格，然後天子親策之，所謂祕閣試六論也。

及試二論，復入三等，得直史館。案選舉志：太宗以來，凡特旨召試者，於中書學士舍人院，或特遣官專試，所試詩賦論頌策制誥，或三篇，或一篇，中格，則授以館職。據此傳，則治平召試館職，惟試論二篇也。哲宗立，復朝奉郎。軾知湖州日，寄祿官爲祠部員外郎，及官制行，改後行員外郎爲朝奉郎。軾始敘復元官，朝奉郎，正當昔之祠部員外郎也。

遂以本官知英州，尋降一官。軾在定州，爲御史所論，落端明殿學士、翰林侍讀學士兩職，但以朝奉郎知英州。降一官者，由朝奉降承議郎也。杭揚穎定皆節度州，英則刺史州，以差遣言之，亦降兩三等。



軾自元祐以來未嘗以歲課乞遷。故官止於此。軾於元祐中任禮部尚書。從二品。翰林學士。正三品。而寄祿官止於朝奉郎。纔正七品。蓋京朝官雖有四年一轉之法。亦必申請吏部。乃得之。容齋三筆載神宗卽位。以刑部郎中劉述今朝散大夫久不磨勘。特命爲吏部郎中。今朝奉大夫兵部員外郎張問今朝請郎十年不磨勘。特遷禮部郎中。今朝奉大夫東坡之久不遷官。亦此類也。

蘇轍傳

六年拜尚書右丞。宰輔表稱蘇轍自龍圖閣學士御史中丞除中大夫尚書右丞。本傳失書。加龍圖閣學士一節。

已而復大中大夫。轍除右丞時。轉官中大夫。在門下侍郎任內。轉大中大夫。傳皆不書。蓋四朝國史於寄祿官多略之。史家因其舊文。不復增益。如此傳前無轉官大中之文。而後云降朝議大夫。復大中大夫。首尾殊不相應矣。

蘇頌傳

泉州南安人。案蘇紳傳稱泉州晉江人。此稱泉州南安人。曾肇撰頌墓志。則云泉州同安人。俱不合。大臨還侍從。頌纔授祕書監。大臨時爲天章閣待制。故稱侍從。其時未改官制。卿監在侍從之下也。及修兩朝國史。及當作召。據墓志。召修國史。提舉中太一宮史局兼宮觀。蓋始於此。南渡後。陸游以提

舉祐神觀兼同修國史亦用此例而職官志亦不之及。

### 趙瞻傳

服除易朝請大夫知滄州。案元豐寄祿格以朝請大夫換前行郎中瞻於神宗初已官司封員外郎矣。史蓋失書轉郎中一節也。元豐改官制後史家於寄祿官多略之而不書。惟王存孫固趙瞻楊簡諸傳猶見一斑爾。

### 鄭雍傳

初邢恕以書抵宰相劉摯摯答曰有自愛以俟休復之語排岸司茹東濟錄書示雍與殿中侍御史楊畏雍畏釋其語曰俟休復者俟他日太后復辟也遂竝以此事論摯威福自恣乞罷之。此事已見摯傳。

### 陸佃傳

遂罷爲中大夫知亳州。案佃除執政時寄祿官已至中大夫矣此乃以本官出知亳州耳。宰輔表云佃前大中大夫與傳互異。

### 陳師錫傳

詞昭慶軍掌書記郡守蘇軾器之。是是軾知湖州昭慶湖州節鎮額也。

### 顏復傳

顏子四十八世孫也。父太初，以名儒爲國子監直講，出爲臨晉簿。當云父太初自有傳。

陶節夫傳

晉大司馬侃之裔也。案史傳之例，與碑誌不同，文人諛墓，追溯得姓之始，臚舉前代名賢，以表世闕。至于史家，宜存限斷。高曾以上，事隔先代，雖譜牒分明，亦當芟汰。宋史諸傳，如劉溫叟云：唐武德功臣政會之後，劉熙古云：唐左僕射仁軌十一世孫，劉載云：唐盧龍節度濟之六世孫，王著云：自言唐相石泉公方慶之後，張藏器云：自言唐相嘉貞之後，石揚休云：唐兵部郎中仲覽之後，楊偕傳：唐左僕射於陵六世孫，李諤云：唐趙國公峘之後，范仲淹云：唐宰相履冰之後，薛映云：唐中書令元超八世孫，鮮于侁云：唐劍南節度使叔明裔孫，齊恢云：唐宰相映之後，郭申錫云：自言唐代公元振之後，石普云：自言唐河中節度使雄之後，張浚云：唐宰相九齡弟九皋之後，李燾云：唐宗室曹王之後，朱倬云：唐宰相敬則之後，魏矼云：唐丞相知古後，杜莘老云：唐工部甫十三世孫，張運云：唐宰相文瓘之後，楊大異云：唐天平節度使漢公之後，陸九齡云：八世祖希聲，相唐昭宗，韓溥云：唐相休之裔孫，羅處約云：唐酷吏希夷之裔孫，李邈云：唐宗室宰相適之之後，顏詡云：唐太師真卿之後，皆承用誌狀之文，未及刊削。若依此例，則蘇之出味道，歐陽之出詢，何以又不書也。此篇敘陶氏而及東晉遙遙華胄，尤無謂矣。

司馬池傳  
自言晉安

平獻王季後，楊覃傳，漢  
尉震之後，與此同。

郭成傳

子浩、紹興中爲西邊大將、至節度使。當云子浩自有傳。

趙挺之傳

贈司徒諡曰清憲。挺之子明誠、建炎初以祕閣修撰、知江寧府、移湖州。史失書。



# 廿二史考異卷七十九

## 宋史十三

### 李綱傳上

尙書右丞許翰言綱忠義捨之無以佐中興會上召見陳東東言潛善伯彥不可任綱不可去東坐誅翰曰吾與東皆爭李綱者東戮都市吾在廟堂可乎遂求去此事又見許翰傳當去此存彼

後有旨綱落職居鄂州案綱罷相在建炎元年七月其落職在是年十月落職者削觀文殿大學士之職也鄂州居住

在是年十一月皆出殿中侍御史張浚之論劾史於浚傳旣諱而不言此傳但於罷相時一言浚劾餘亦略不及之蓋史家爲張護短非直筆也綱於洪芻陳沖輩皆爲救解而獨致宋齊愈於死固難免上下其手之嫌乃浚於綱罷相之後抨擊不已甚至指爲國賊又謂綱於蔡氏門人雖誤事亂政力加薦引非竄殛不足以靖天下而於汪黃之姦邪則緘口不言斯誠變亂黑白之甚者矣浚疏具載李心傳繫年要錄予故表而出之讀史者勿以其晚節之善而置之不論也

### 李綱傳下

贈少師官其親族十人案宋史紀傳於東都九朝餘簡尙爲有法南渡以後蕪雜殊甚李綱固賢相其

傳乃至兩卷。毋乃太繁乎。其諡忠定。則傳仍漏而不書。何也。列傳第一百七十八。宣繒、李鳴復、鄒應龍、別之傑、金淵、第一百七十九。張礪、馬天驥、朱熠、饒虎臣、戴慶炯、沈炎、第一百八十二。趙與憲諸人。但敘官階。全無事實。又何太簡乎。蓋史於南渡七朝。敘事不如九朝之密。而寧宗以後。又不如高孝光三朝之詳瞻也。

張浚傳

始粘罕病篤。語諸將曰。自吾入中國。未嘗有敢撓吾鋒者。獨張樞密與我抗。我在。猶不能取蜀。我死。爾曹宜絕意。但務自保而已。兀朮怒曰。是謂我不能邪。粘罕死。竟入攻。果敗。案此語本之朱文公所撰行狀。然粘罕以天會十四年卒。卽紹興七年也。而吳玠破敵。乃在紹興元年。其時粘罕尙無恙。富平之戰。粘罕亦未入陝。皆不可信。李心傳云。案諸書。此時粘罕在雲中。實婁宿死。行狀誤也。

連日南軍小不利。忽牒報敵兵大至。顯忠夜引歸。浚上疏待罪。案袁桷跋外高祖史。魏王尺牘云。朱文公作張忠獻行狀。一出南軒之筆。不過題官位名姓而已。後考三敗事迹。始悔昔年不加審覈。歸咎南軒。然亦無及矣。符離之敗。陵陽李伯微甫載其事甚詳。云符離之役。軍資器械。失亡殆盡。張魏公初聞之。疑金人踵至。甚懼。卽軍中解所佩魚。遣歸。朝官太平州通判劉蘊古。假朝議大夫。使北求和。僚吏有止之者。乃奏乞致仕。又乞朝廷遣使。孝宗不從。旣而金人不復南。魏公乃謀再舉。上亦不從。及和議將

成。魏公持之甚確。左相湯慶公因白蘊古之事。由是魏公遂緇。李與張俱蜀士。史筆不敢有所隱避也。  
伯微心傳字。浚有恢復之志。而無恢復之才。平居好大言。以忠義自許。輕用大衆。爲僥倖之舉。故蘇雲卿料其無成。史家以其子爲道學宗。因於浚多溢美之詞。符離之敗。但云南軍小不利而已。豈信史乎。

### 呂頤浩傳

以知紹興府朱勝非同都督諸軍事。勝非傳失書知紹興府事。繫年錄勝非除知紹興府在五月戊子除同都督在七月辛巳復知紹興在八月壬辰及除經筵在是月戊戌

史家以其未赴任故略之耳。

給事中胡安國論勝非必誤大計。勝非復知紹興府。尋以醴泉觀使兼侍讀。安國持錄黃不下。頤浩特命檢正諸房文字。黃龜年書行安國以失職求去。罷之。檜上章乞留。安國不報。此事又見安國傳。當去此存彼。

### 韓世忠傳

始補進義副尉。神道碑作守闕進義副尉。守闕者未正授之名也。此二字不可省。

轉進勇副尉。神道碑作進武副尉。

宣撫副使李彌大斬之。碑作宣撫使李綱。

以功遷左武大夫。果州團練使。詔入朝。除正任單州團練使。正任者落階官也。職官志凡未落階官者。



爲遙郡。除落階官者爲正任。靖康元年。臣僚言。遙郡正任。恩數遼絕。自遙郡遷正任者。合次第轉行。今自遙郡與落階官而授正任。直超本等正官。是皆姦巧希進躡取。乞應遙郡承宣使有功勞。除正任者。止除正任。刺使從之。世忠以遙任團練使。當歷遙郡防禦觀察承宣使及正任刺史。而後轉正團練使。今就遷正任。非常格也。

時張遇自金山來降。抵城下。不解甲。人心危懼。世忠獨入其壘。曉以逆順。案呂頤浩傳。頤浩單騎與世忠造其壘說之。

授檢校少保。武寧昭慶軍節度使。武寧碑作武勝。

孝宗朝。追封蘄王。諡忠武。詔禮部尙書趙雄撰神道碑。御書額曰。中興佐命定國元勳之碑。傳失書。

### 劉琦傳

德順軍人。劉仲武傳云。秦州成紀人。父子別傳。而籍貫互異。

### 吳璘傳

追封信王。傳失書璘諡。又乾道八年。以子挺請立碑。詔翰林學士王曠撰文。賜額曰。安民保蜀定功同德之碑。傳亦不及之。

### 楊存中傳

父震知麟州建寧砦。金人來攻，亦死于難。當云父震，見忠義傳。存中旣顯，請于朝。宗閔諡忠介，震諡忠毅。案忠義傳，震諡恭毅。王明清揮塵錄亦同。此云忠毅，疑誤也。宗閔諡不見於忠義傳，當移此就彼。

### 郭浩傳

順德軍隴千人。順德當作德順。郭成傳云：德順中安堡人，與此傳地名小異。

### 王德傳

再贈少傅。二子琪、順，亦以驍勇聞。德諡威定，贈至太師。琪，官武康軍承宣使，主管殿前司公事，皆見景德建康志。德第三子琪，名見忠義傳。史譌琪爲拱，又不云德子，皆疏漏也。

### 張憲傳

飛愛將也。飛上脫岳字，憲與楊再興、牛皋、胡閔休俱當附岳飛傳。刊修者改其次第，未及訂正爾。憲再興兩傳，俱不箸里居。

### 曲端傳

婁宿攻陝西。婁宿，卽婁室也。室宿聲相近。

### 趙密傳

太原清河人。清河當是清源之譌。

胡世將傳

賜三品服。宋初承唐制。三品以上服紫。五品以上服緋。元豐官制。大中大夫從四品。卽服紫。朝奉大夫從六品。卽服緋。與唐制異矣。史家以賜紫爲三品服。賜緋爲五品服。蓋失其實。

馮澥傳

靖康元年。澥爲左諫議大夫。是時欽宗懲王安石、蔡京之誤國。政事悉以仁宗爲法。澥上言。仁宗陛下之高祖也。神宗陛下之祖也。子孫之心。寧有厚薄。王安石、司馬光皆天下之大賢。其優劣等差。自有公論。願無作好惡。允執厥中。則是非自明矣。詔榜諸朝堂。侍御史李光駁之。不聽。復爲右正言。崔鶻所擊。宰相不復問。而遷澥吏部侍郎。其在崇寧中。首上書。廢元祐皇后。自選人除寺監丞。見容齋隨筆傳皆諱而不書。失懲惡之旨矣。請廢后事。雖附書於錢通傳。而本傳絕不一及。且云登進士第。歷官入朝。以言事再謫。似入官以來。言行無玷者。豈非變亂黑白之甚者乎。

王倫傳

帝使倫謂左副元帥昌曰。此傳前稱左副元帥昌。後稱撻懶。撻懶卽昌也。宋汝爲傳。前稱完顏宗弼。後稱兀朮。兀朮卽宗弼也。

金欲以倫爲平瀼三路都轉運使。倫曰。奉命而來。非降也。案金史本傳。以倫爲平州轉運使。倫已受命。

復辭遜上曰此反覆之人遂殺之與宋史異倫既恥事二姓甘以身殉豈有先已受命之理當從宋史爲正。

### 宇文虛中傳

淳熙間贈開府儀同三司諡肅愍。案虛中與王倫俱奉使爲金人所殺宋金二史各爲立傳但虛中仕金已久雖以不忘故國獲禍究宜入於金史倫則宋之純臣卽列之忠義亦無媿詞斷不應附於金史也。

### 尹穡傳

字少稷建炎中興自北歸南。傳失書其里居。

### 洪皓傳

紹興十二年七月見於內殿。案皓於建炎己酉出使留金十五年其歸當以紹興十三年癸亥傳云十

二年者誤。戈宙襄云案繫年錄紹興十三年六月金人遣皓還行在七月戊戌引見內殿。

### 洪遵傳

知隆興二年貢舉拜同知樞密院事。案宋自治平以後三歲一科舉隆興二年非貢舉之歲蓋元年之誤樓鑰傳隆興元年試南宮策偶犯舊諱知貢舉洪遵奏得旨以冠末等是其證也遵入樞府在元年

五月亦非二年事。

洪邁傳

六年除知贛州。案中興學士院題名。乾道四年。邁自直院除集英殿修撰宮觀。蓋自禁林罷職。予祠。復起知州。史失載奉祠一節。

十一年知婺州。遷敷文閣待制。明年召對。以提舉佑神觀兼侍講。同修國史。進敷文閣直學士。直學士院。十三年九月。拜翰林學士。案傳。先書乾道二年三年六年。以次及十一年十三年。然乾道紀元止於九年。下得有十一年十三年也。考中興學士院題名。淳熙十三年四月。洪邁以敷文閣直學士兼直院。九月。除翰林學士。又容齋隨筆云。淳熙十二年。邁自婺召還。又云。淳熙十四年當作十三年九月。予以雜學士拜翰林學士。則史所云十一年十三年者。實淳熙之十一年十三年矣。

淳熙改元。進煥章閣學士。知紹興府。淳熙當爲紹熙之譌。容齋隨筆云。紹興元年。予自當塗徙會稽。過闕者是也。考學士院題名。邁以淳熙十五年四月。由翰林學士差知鎮江府。又太平州瑞麻贊。作于己西八月云。予假守十閱月。則是十五年之冬。由鎮江移知太平州。至紹熙改元。移紹興府。除授次第。班班可考。本傳皆缺而不書。又誤紹熙爲淳熙。失之甚矣。

明年再上章告老。進龍圖閣學士。尋以端明殿學士致仕。是歲卒。年八十。據傳文。似淳熙二年告老。卽

以其年卒。今考之不特淳熙字誤。卽謂卒於紹熙二年亦誤也。容齋三筆成於慶元二年六月。其序云。予從會稽解組還里。于今六年。年齡之運踰七望八。則是慶元二年丙辰。邁年尙未盈八十也。據續筆云。乾道己丑年四十七。邁既壽至八十。其卒當在嘉泰二年壬戌矣。

### 富直柔傳

故事。簽書有以員外郎爲之。而無三丞爲之者。中書言非舊典。時直柔爲奉議郎。乃特遷朝奉郎。自是寄祿官三丞除二府者。遷員外郎。自直柔始。遂爲例。予案元豐寄祿格。以朝奉郎換後行員外郎。以奉議郎換太常祕書殿中丞。所謂三丞也。直柔時爲奉議郎。當昔之三丞。故中書以爲非例。因特遷兩官。自後以奉議除兩府者。皆遷朝奉郎。由直柔始也。元豐以後。員外郎三丞皆爲職事官。不以寄祿。中書所引故事。乃元豐以前名目。非南渡後名目。傳乃云。自是寄祿官三丞除二府者。遷員外郎。似南渡尙以三丞員外郎寄祿。誤甚矣。石熙載以太平興國四年正月。自右補闕爲兵部員外郎。樞密直學士。才七日。簽書院事。見容齋四筆。此員外郎簽書樞密故事也。

上虞縣丞婁寅亮上書言。宗社大計。欲選太祖諸孫伯字行下有賢德者。視秩親王。使牧九州。以待皇嗣之生。退處藩服。疏入。上大歎悟。直柔從而薦之。召赴行在。除監察御史。寅亮已自有傳。此文重出。

### 潘良貴傳

會戶部侍郎向子諲入見。語言煩褻。良貴故善子諲。是日攝起居。立殿上。徑至榻前厲聲曰。子諲以無益之談。久煩聖聽。子諲欲退。高宗顧良貴曰。是朕問之。又諭子諲。且款語。子諲復語久不止。良貴叱之退。者再。高宗色變。局門併彈之。此事又見子諲傳。

向子諲傳

臨江人。敏中玄孫。敏中開封人。南渡後子孫遷居臨江。蔡襄仙游人。而後徙居雪川。蔡洸傳任伯雨眉州

人。而其後居邵武。任希夷傳劉摯東光人。而其後居龍游。劉甲傳

李朴傳

翰林承旨范純禮。案純禮傳。嘗爲樞密都承旨。非翰林承旨也。

楊愿傳

愿字原仲。史失書其里居。李心傳繫年錄云。山陽人。

句龍如淵傳

句姓本出古句芒。高宗卽位。避御名。更句龍氏。案容齋續筆。政和中。禁中外不許以龍天君玉帝上聖

皇等爲名字。於是毛友龍但名友葉。天將但名將樂。天作但名作。句龍如淵但名句如淵。衛上達賜名仲達。葛君仲改爲師仲。方天任爲大任。方天若爲元若。余聖求爲應求。周綱字君舉。改曰元舉。程振字

伯玉改曰伯禹。然則如淵本是句龍氏。政和中回避去龍字。南渡避高宗嫌名。復其舊耳。廣韻句當字與句姓竝與構同音。句龍之句則平聲。故無嫌也。句芒字。經典亦讀古侯切。唯華陽國志云。王平句扶。張翼。廖化。竝爲大將軍。時人曰。前有王句。後有張廖。此句字乃是去聲。傳云出句芒者。疑非其實。句濤亦蜀人。仕高宗朝。獨不改姓。史未詳其故。

卽擢如淵中司。中司者。御史中丞也。此流俗之稱。不當用之正史。

### 陳俊卿傳

殿前指揮使王琪。琪。德之子。

子五人。宓有志於學。終承奉郎。朱熹爲銘其墓。宓自有傳。當云子宓自有傳。

### 錢端禮傳

拜端明殿學士。簽書樞密院事。史失書。賜進士出身。宋制非進上而入兩府者。必先賜出身。

孫象祖。嘉定元年爲左丞相。自有傳。今宋史無象祖傳。蓋史臣初擬立傳。而後缺之。王安節傳云。節度使堅之子。呂文信傳云。文德之弟似堅。文德亦有傳。而史無之。南渡七朝事多疏漏。不及前九朝之完善。由於程限迫促。草草成書。不暇檢閱也。

### 劉琪傳



殿前指揮使王琪被旨案視兩淮城壁還密薦和州教授劉甄夫上諭執政召之琪請曰此人名位微何自知之上以琪告此事又見陳俊卿傳俊卿與琪同時執政而琪在西府琪之罷斥琪當有力焉史家推美俊卿亦載此節宜去彼存此

范成大傳

除吏部郎官言者論其超躐案周必大撰神道碑云除吏部員外郎言者以不先攝爲超遷蓋當時除郎官率先權而後兼然後正授故以不先攝爲超躐也

紹熙二年加大學士四年薨碑稱紹熙三年加資政殿大學士知太平州下車踰月請祠祿復得洞霄而歸傳失載知太平一節紀年亦互異

李燾傳

除兵部員外郎兼禮部郎中案周必大撰燾神道碑云除兵部郎中以父諱下行員外郎又兼禮部其

云兼禮部者兼員外郎也碑又云十二月正除禮部員外郎此傳兩書郎中皆誤律麻志稱禮部員外郎李燾

時乾道新麻成燾言麻不差不改不驗不用未差無以知其失未驗無以知其是此語又見律麻志

進祕閣修撰權同修國史權實錄院同修撰案中興館閣錄李燾以淳熙三年正月除祕書監兼權同修國史兼權實錄院同修撰此不書祕書監而書祕閣修撰誤也祕書監正官也祕閣修撰外任帶職

也。兼既爲祕書監。不當更帶此職。

尤袤傳

遷江西漕。案宋人稱轉運爲漕司。或使或副使或判官。視其資歷淺深授之。依史例。當稱江西轉運某官。此云江西漕。乃案牘之文。不合史法。李椿傳。移湖北漕。劉光祖傳。將漕利路。徐邦憲傳。除江西憲改江東漕。楊大異傳。兼漕庾二司。其失竝同。憲庾亦流俗之稱。憲者提刑也。庾者提舉常平也。



# 廿二史考異卷八十

## 宋史十四

### 周必大傳

婺州四年易守者五平江四年易守者四案必大此奏在乾道七年以吳郡志牧守題名考之乾道三年直祕閣姚憲知府事五年憲改兩浙運判而敷文閣待制徐嘉代之六年嘉除宮觀而端明殿學士汪應辰代之是年應辰除宮觀而觀文殿學士魏杞代之所謂四年而更四守也

### 留正傳

六代祖從效事太祖爲清遠軍節度使封鄂國公清遠當作清源從效事見世家此但當云清源軍節度使從效之六世孫

紹興十三年第進士案正卒於開禧二年丙寅年七十八則是生於建炎三年己酉至紹興十三年纔十有五歲耳恐登第不當如是之少今據曾宏父鳳墅帖跋稱梁文靖紹興庚辰魁多士先君少師乃是年擢第與留忠宣俱爲同年友知留正實紹興三十年進士傳寫顛倒以三十爲十三耳子恭丙端皆爲尙書郎案恭在嘉定初提舉浙西常平改浙西提刑知紹興府

黃裳傳

遷國子博士以母喪去。案樓鑰撰墓誌其時除國子錄非博士也。

林大中傳

知撫州金谿縣郡督輸賦急大中請寬其期不聽納告敕投劾而歸。案樓鑰撰神道碑云郡督財計太急公請寬以歲月不敢有負又貽書再三不聽公取告敕納之州請劾而去守媿謝許之邑民感公恐其受責競輸於郡視歲額反加焉然則未嘗投劾歸也。

詹體仁傳

光宗卽位提舉浙西常平除戶部員外郎湖廣總領。案吳郡志朝奉郎張體仁淳熙十六年六月時光宗已

卽到浙西常平任紹熙元年十月除戶部郎官湖廣總領卽其人也今蘇州府學有石刻同年疇唱詩亦題浦城張體仁元善而史作詹其更姓之故史家失書考葉適撰墓誌云初後其舅張氏既復爲詹氏。

梁汝嘉傳

紹興二十三年卒。汝嘉仕高宗朝不與韓侂胄同時乃與胡紘何澹諸人同卷且殿之卷末殊失其次論內亦絕不及汝嘉此編次之誤也。權邦彥紹興初執政乃列於趙雄程松之間亦失其次列傳第百

五十八卷。鄭穀、仇愈、高登、婁寅亮、宋汝爲五人，皆高宗朝士，而卷次乃在光寧朝臣之後。編第尤爲乖刺。

### 徐應龍傳

字允叔，史失書里居。據徐清叟題名石刻，乃建安人。

知瑞州高安縣。瑞州當作筠州，避理宗諱追改。

子榮叟，官至參知政事。諡文靖。深叟，官終將作監丞。清叟，知樞密院事，兼參知政事，各有傳。案榮叟傳，在百七十八卷。清叟在百七十九卷。清叟初未有傳也。榮叟傳，但云簽書樞密院事，不云參知政事，又不載文靖之諡。

### 王阮傳

曾祖韶，神宗時開熙河擒木征。祖厚，繼關隴鄙。當云曾祖韶、祖厚，自有傳。

### 陸游傳

蔭補登仕郎。祖孫父子各有傳，而不同卷者，例當互見，以徵世系。陸游爲尙書左丞佃之孫，以蔭入官，而兩傳絕無一言及之，何也。

紹熙元年，遷禮部郎中，兼實錄院檢討官。案陸游渭南集、跋松陵集云：淳熙十六年四月二十六日，予

以禮部郎兼膳部。又考劍南詩藁。有南省宿直詩。在己酉元日之後。行在春晚之前。則其除禮部郎。必在淳熙十六年之春。正光宗卽位之初也。集中又有跋金奩集一篇。題云。淳熙己酉立秋。觀于國史院直廡。則其兼史局檢討。亦在是年立秋以前也。其冬。卽被劾還里。故齋中雜感詩。有去國己酉冬之句。明年改元紹熙。游已奉祠去官矣。游以提舉沖祐觀。慶元五年致仕。明年。加直華文閣。嘉泰二年。有詔以元官提舉佑神觀。兼實錄院同修撰。兼同修國史。蓋自禮部罷官奉祠者十年。致仕又三年。而後應修史之召。本傳所書。太疏漏矣。

遂升寶章閣待制。寶章當作寶謨。

嘉定二年卒。年八十五。案陳氏書錄解題云。嘉定庚午。年八十六而終。今考劍南集。有絕句詩云。嘉定三年正月後。不知幾度醉春風。則嘉定三年正月。游尙無恙。傳云年八十五者。非也。

### 邱密傳

其西路則同轉運使張穎。揀刺爲御前武定軍。以三萬人爲額。分爲六軍。案兵志。淮西廬州有武定游奕軍。濠州有武定選鋒軍。武定後軍。定遠有武定軍。當是左軍。脫左字。安豐有武定前軍。武定右軍。所謂六軍也。

### 宇文紹節傳

父子皆以使北死。無子。孝宗愍之。命其族子紹節爲之後。案樓鑰撰宇文師說墓誌。紹節實師說之少子。師說父時中。則虛中弟也。

### 汪大猷傳

沒贈二官。據周必大撰神道碑。大猷本宣奉大夫。遺奏贈特進。中隔金紫銀青光祿兩階。乃是贈三官也。

### 李孟傳

嘗誡其子孫曰。安身莫若無競。修己莫若自保。守道則福至。求祿則辱來。四語本王弼注易。

### 商飛卿傳

金陵故有帥漕治所。合戎騎二帥留鑰內侍號六司。帥司謂江東安撫使司。漕司謂江東轉運使司。戎司謂御前諸軍都統制司。騎司謂侍衛馬軍司。留鑰內侍謂行宮匙鑰司。以內侍一員掌之。凡五司併江東淮西總領所。是爲六司。

### 洪咨夔傳

嘉定二年進士。案嘉定二年。非貢舉之歲。當從咸淳臨安志作嘉泰。史嵩之入相。召赴闕下。進刑部尙書。案理宗紀。咨夔卒於端平三年六月。其時嵩之尙未入相。且咨夔



方在朝任用。何以又有召赴闕之語。傳殆誤也。及檢臨安志人物傳云。時有自詭和戎除刑書者。咨夔繳駁之。乃出。方悟此傳致誤之由。夫所謂自詭和戎者。卽史嵩之也。嵩之除刑部。意在大用。因咨夔繳駁。改除外任。史乃謂嵩之入相。召赴闕下。似咨夔爲嵩之所引者。豈非顛倒黑白之甚者乎。本是嵩之除刑部尙書。今以爲咨夔之官。益荒唐可笑矣。

加端明殿學士卒。案咨夔有子勳。勳皆通顯。勳字伯魯。登淳祐四年進士。少爲崔與之。魏了翁所知。仕至兵部尙書。諡文靖。傳何以略而不書。

### 吳昌裔傳

蚤孤。與兄泳。痛自植立。案泳傳。在第一百八十二。泳字叔永。昌裔字季永。泳傳云。潼川人。而昌裔傳云。中江人。中江卽潼川屬縣也。於史例當合傳。今旣分而二之。又不云兄泳自有傳。失史法矣。

### 陳宓傳

丞相俊卿之子。史家之病。在乎立傳太多。祖孫父子。事迹可比附者。當連而及之。如王素當附其父旦。

傳。劉瑾當附其父沆傳。魯有開當附其從父宗道傳。張瓌當附其祖洎傳。孫瑜當附其父奭傳。馬仲甫當附其父亮傳。吳遵路當附其父淑傳。而以子瑛次之。張翥當附其父奎傳。王堯臣當與叔父洙合傳。楊寘當附其兄察傳。尹源當附其兄洙傳。顏復當附其父太初傳。王栴當附其祖倫傳。宇文紹節。

當附其祖虛中傳。李孟傳當附其父光傳。張忠恕當附其祖浚傳。陳宓當附其父俊卿傳。袁甫當附其父燮傳。蔡抗當附其祖元定傳。孟珙當附其父宗政傳。趙葵兄弟當附其父方傳。陸持之當附其父九淵傳。洪芹當附其曾祖适傳。

少嘗登朱熹之門。案宋史最推崇道學而尤以朱元晦爲宗。朱氏門人黃榦、李燔、張洽、陳淳、李方子、黃灑。旣入道學傳。而儒林傳又列蔡元定及子沈廖、德明、葉味道四人。至如詹體仁傳。則云少從朱熹學。任希夷傳。則云從朱熹學。陳宓傳。則云少及登朱熹之門。劉燾傳。則云與弟韜仲受學於熹。王介傳。則云從熹游。曹彥約傳。則云嘗從熹講學。傅伯成傳。則云少從熹學。徐僑傳。則云登熹之門。黃贊傳。則云嘗從熹學。薛叔似傳。則云雅慕朱熹。窮道德性命之旨。趙蕃傳。則云年五十猶問學於熹。趙汝談。則云嘗從熹訂疑義十數條。熹嗟異之。陳韡傳。則云父孔頌爲熹門人。包恢。則云父揚。世父約。叔父遜。從熹學。杜範傳。則云從祖受學熹。牟子才傳。則云學於魏了翁。又從李方子。朱熹門人也。吳昌裔傳。則云聞漢陽守黃榦得熹之學。往從之。董槐傳。則云聞輔廣者。朱熹之門人。復往從廣。趙葵傳。則云遣從南康李燔爲有用之學。黃師雍傳。則云從黃榦學。徐元杰傳。則云聞陳文蔚講書鉛山。實熹門人。往師之。李道傳。則云雖不及登熹之門。而訪求所嘗從學者與講習。趙景緯傳。則云恨不及登熹之門。熹門人葉味道謂之曰。度正吾黨中第一人。也是往來味道正之間。史彌鞏傳。則云子蒙卿著書立言。一以

朱熹爲法。蓋自嘉定以後。朱學盛行。理度二宗。皆以尊尙道學爲先務。故一時士大夫。莫不援附朱氏。淵源以自重耳。

徐經孫傳

字子立。史失書其里居。

牟子才傳

作言與孔光、張禹切責清之。與當作以。

又寫力士脫鞵之狀。爲之贊而刻諸石。案子才所刻太白脫鞵山谷返櫂二圖。在太平州學。今尙存。

趙汝談傳

字履常。案汝談、汝讜、希館、希咽四人。傳失書其世系。與它篇異。且宗室子洎等廿五人傳。旣列於諸王之次。而汝談等七人。別編於南渡諸臣之列。均爲宗室。何以區分如此。此亦體例之可議者。竊謂宋之宗室。唯汝愚當自爲傳。而以子崇憲、孫必愿、曾孫良淳附焉。其餘皆可類敍爲一卷。汝騰、與憲、不試、令巖、師檟、與擇、士隆、伯振、時賞、希洎、孟朶等。亦當入宗室傳。毋庸散入別傳。何氏宋史新編并汝愚父子亦入宗室餘俱與予說同

趙與權傳

時嵩之猶子璟卿。誦言其過。忽斃。而杜範、劉漢弼、徐元杰、三賢暴死。人皆疑嵩之致毒。案徐劉二人暴

卒當時疑嵩之所爲。三學諸生上章論列。置獄鞠治。然亦無驗。考其時嵩之失權歸里。已半年矣。鄞與臨安相隔又遠。謂能肆毒於朝貴。此理之難信者。人云亦云。姑存爲莫須有之案可也。若杜範暮年入相。力疾赴召。本傳於範之薨。初無疑詞。以是咎嵩之未免疾之已甚矣。程公許奏元杰事云。漢弼之死。固可疑。範之死。人言籍籍。然漢弼類風淫末疾。範亦尪弱多病。諉曰天命猶可也。則公許於範之死。亦未嘗質言也。

### 史彌遠傳

彌遠力陳危迫之勢。皇子詢聞之。亟具奏。乃罷侂冑。并陳自強右丞相。旣而臺諫給舍交章論駁。侂冑乃就誅。案彌遠稱奉密旨。在十一月甲戌。翌日。侂冑入朝。已爲夏震所誅。其時詔旨尙未宣布外廷。何待臺諫給舍交章論駁。而始就誅乎。史家欲寬彌遠擅殺之罪。故爲此語。

寧宗崩。擁立理宗。案彌遠之姦。倍於侂冑。而獨不預姦臣之列。傳于謀廢濟王事。并諱而不書。尙得云直筆乎。推原其故。則以侂冑禁僞學。而彌遠弛其禁也。彌遠得政。祇欲反侂冑之局。雖秦檜之姦。愚衆著。尙且爲之昭雪。豈能崇尙道學者。使朱元晦尙存。未必不排而去之。史臣徒以門戶之見。上下其手。可謂無識矣。

### 鄭清之傳

是時金雖亡而入洛之師大潰。案端平入洛之師最爲無名。趙范全子才輩寡謀召釁。固不足責。而主張其事者。清之也。理宗德其立己之功。委任如故。而傳亦諱之。竟若置身局外者。難以言直筆矣。

史嵩之傳

慶元府鄞人。當云彌遠從子。不必更舉里居。其父彌忠。官亦顯。而傳失書。

傅伯成傳

兩爲部使者。案劉克莊撰伯成行狀云。知撫州。未至。除湖北提舉常平。改成都路提點刑獄。卽傳所云兩爲部使者也。

遷工部侍郎。行狀無侍字。下文方云進右司郎官。則此時當除工部郎官。非侍郎也。

御史中丞鄧友龍。遂劾伯成罷之。據行狀。罷劾之後。復除浙東提刑。遷直龍圖閣。知慶元府。皆有政績。而傳失書。

拜左諫議大夫。據行狀。論倪忠。李壁二事。在拜諫議之後。傳所書蓋失其次。行狀又云。高似孫嘗獻侂胄九詩。皆有錫字。公論其有無君之心。丁常任以嘗諫用兵。牽復。公言常任始結曾覲。後結蘇師旦。前日之議。非真知兵之不可用。受教於師旦耳。此二事亦傳所當書也。

以集英殿修撰。知建康府。建康當作建寧。

嘉定八年召赴闕。上文有嘉定元年。此不當更有嘉定字。據行狀。嘉定四年請祠。進煥章閣待制。提舉太平興國宮。傳又失書。

除寶謨閣直學士。通奉大夫致仕。案行狀。是年除寶謨閣直學士。提舉玉隆萬壽宮。十年若老不獲。提舉鴻慶宮。十二年復請老。進顯謨閣直學士。通奉大夫致仕。蓋是年自待制遷直學士。猶食祠祿。及再任祠祿滿。始易閣銜致仕也。傳誤合爲一事。

理宗卽位。升直學士。直當作眞。伯成久爲直學士矣。此由直學士升學士。故云眞。

### 葛洪傳

進端明殿學士。同簽書樞密院事。宰輔表。嘉定十七年十一月。洪除同簽書樞密院事。寶慶元年十一月。進簽書樞密院事。紹定元年十二月。除參知政事。傳失書簽書一節。

### 曾三復傳

乾道六年進士。案三復之子宏。父刻鳳墅法帖。其跋云。梁文靖紹興庚辰冠多士。乾道壬辰入相。南渡百年。以大魁秉鈞。方見文靖先君少師。乃是年擢第。與留忠宣俱爲同年。詳其文義。謂三復亦紹興庚辰進士。與梁留二相爲同年耳。林大中亦紹興三十年進士。故與三復帖自稱年末也。史於留正傳云。紹興十三年第進士。蓋三十字誤顛倒耳。此傳作乾道六年。尤誤。豈誤讀鳳墅帖。謂三復以乾道壬辰

擢第壬辰本乾道八年。又譌八爲六邪。宋時進士三年一舉。常以辰戌丑未年。乾道六年庚寅。非科舉之歲也。

轉太常少卿。案金史交聘表。明昌六年正月。宋試禮部尙書。曾三復賀正旦。卽宋慶元元年也。本傳失書。

### 趙葵傳

淳祐四年。授同知樞密院事。十二月。拜知樞密院事。兼參知政事。又特授樞密使。兼參知政事。督視江淮京西湖北軍馬。封長沙郡公。尋知建康府行宮。留守江東安撫使。案理宗紀。葵以淳祐四年十二月。同知樞密院事。五年十二月。知樞密院事。兼參知政事。七年四月。授樞密使。兼參知政事。督視江淮京西湖北軍馬。尋兼知建康府行宮。留守江東安撫使。宰輔表所書年月。亦與紀同。惟以知建康府行宮。留守江東安撫使。封長沙郡公。繫于八年五月。考景定建康志。葵知府事。在七年六月九日。蓋表誤也。傳所書年月。殊疏漏。

### 吳潛傳

字毅夫。宣州寧國人。案中興館閣續錄。潛字毅父。建康府溧水人。四明續志。潛自署金陵吳潛毅父。與館閣錄合。

授承事郎簽鎮東軍節度判官。案南宋諸臣列傳於寄祿官皆略而不書。此傳云授承事郎轉朝散郎。

轉中大夫與它傳異。蓋史臣不諳官制。芟削有未盡也。戈宙雲云楊簡傳中載寄祿官亦甚詳。

端平元年詔求直言。潛所陳九事。案景定建康志。潛自淮西總領。端平元年四月二十七日。準省劄除

祕閣修撰樞密都承旨。五月六日離任。此應詔言事。必在入朝以後。傳失書除樞密承旨一節。

以久任勾祠。且累章乞歸田里。進封慶國公。案四明續志。寶祐四年九月。大使丞相吳公出鎮。開慶元

年八月十七日。再疏乞歸田里。奉御筆。吳潛三年海閩。備竭勤勞。屢疏乞歸。高節可尙。可依舊觀文殿

大學士判寧國府。特進封崇國公。史作慶國。則與下文進封慶國重出。當依四明續志改正。

屬將立度宗爲太子。潛密奏云。臣無彌遠之材忠。王無陛下之福。帝怒。案劉應龍傳亦云。理宗久無子。

以弟福王與芮之子爲皇子。宰相吳潛有異論。今以時事考之。殊不近情。蓋潛於端平初奏事。已有植

國本之語。其後又有請養宗子以係國本之奏。其後又有遴選近族以係人望之奏。豈容皇子既立之

後。更有異議。且立度宗爲皇子。在寶祐元年。其時潛固未在朝。若復相之後。皇子名分久定。豈有彌遠

更立之嫌。尤爲擬不於倫矣。推原其故。特以鄂圍未解。潛有遷幸之議。爲帝積銜。故似道之譖易入。乃

贊成建立東宮。授意臺諫。謂其不樂建儲耳。

### 文天祥傳



南官王績翁。元史作積翁。附見其子都中傳。卻不載薦天祥事。

宣繪傳

慶元府人。案繪官至執政。而傳無一事可紀。考袁燮絜齋集。有何夫人宣氏墓志。卽繪之妹也。志稱其母史氏。故太師越忠定王之從妹。則繪實以史氏甥爲彌遠援引。而傳隱而不言。

陳宗禮傳

字立之。史失書其里居。

史彌鞏傳

子能之。有之。胄之。俱進士。能之。咸淳初由太府寺丞知常州。撰毘陵志三十卷。

楊大異傳

除祕閣修撰。太中大夫。提舉崇禧觀。醴陵縣開國男。食邑三百戶。賜紫金魚袋。案五等之封。唯國公郡公書之。自侯以下例不書。食邑食實封。賜緋紫。例皆不書。太中大夫。寄祿官也。亦可不書。以史例言之。但當云除祕閣修撰。提舉崇禧觀耳。